

宋

史

七三



列傳卷第一

宋史二百四十二

開禧三司檮鑿國畫事前畫景相撥國史領經進事都總裁院等奉

勅修

后妃上

太祖母昭憲杜太后

太祖孝惠賀皇后

孝明王皇后

孝章宋皇后

太宗淑德尹皇后

懿德符皇后

明德李皇后

元德李皇后

真宗章懷潘皇后

章穆郭皇后

章獻明肅劉皇后

李宸妃

楊淑妃

沈貴妃

仁宗郭皇后

慈聖光獻曹皇后

張貴妃

苗貴妃

周貴妃

楊德妃

馮賢妃

英宗宣仁聖烈高皇后

周人尊祖之詩曰厥初生民時維姜嫄蓋推本后稷之所自出以為王跡之所由基也宋之興雖由先世積累然至宣祖功業始大昭憲杜后實生太祖太宗

內助之賢母範之正盖有以開宋世之基業者焉觀  
其訓太祖以無逸治天下至於豫定太宗神器之傳  
為宗社慮盖益遠矣厥後慈聖光獻曹后擁佑兩朝  
宣仁聖烈高后垂簾聽政而有元祐之治南渡而后  
若高宗之以母道事隆祐孝宗奉明慈怡愉之樂皆  
足以為百王法程宋三百餘年外無漢王氏之患內  
無唐武韋之禍豈不卓然而可尚哉昭憲垂裕之功  
至是茂矣舊史稱昭憲性嚴毅有禮法易之家人上  
九曰有孚威如終吉其是之謂歟作后妃傳

太祖母昭憲杜太后定州安喜人也父爽贈太師母

范氏生五子三女太后居長既笄歸于宣祖治家嚴毅有禮法生邕王光濟太祖太宗秦王廷美夔王光贊燕國陳國二長公主周顯德中太祖為定國軍節度使封南陽郡太夫人及太祖自陳橋還京師人走報太后曰點檢已作天子太后曰吾兒素有大志今果然太祖即位尊為皇太后太祖拜太后於堂上眾皆賀太后愀然不樂左右進曰臣聞母以子貴今子為天子胡為不樂太后曰吾聞為君難天子置身兆庶之上若治得其道則此位可尊苟或失馭求為匹夫不可得是吾所以憂也太祖再拜曰謹受教建隆

二年太后不豫太祖侍藥餌不離左右疾亟召趙普  
入受遺命太后因問太祖曰汝知所以得天下乎太  
祖嗚噎不能對太后固問之太祖曰臣所以得天下  
者皆祖考及太后之積慶也太后曰不然正由周世  
宗使幼兒主天下耳使周氏有長君天下豈為汝有  
乎汝百歲後當傳位于汝弟四海至廣萬幾至衆能  
立長君社稷之福也太祖頓首泣曰敢不如教太后  
顧謂趙普曰尔同記吾言不可違也命普於榻前為  
約誓書普於紙尾書臣普書藏之金匱命謹密宮人  
掌之太后崩于滋德殿年六十謚曰明憲葬安陵神

計字四百三十个  
身及傳者  
主祔享太廟乾德二年更謚昭憲合祔安陵

太祖孝惠賀皇后開封人右千牛衛率府率景思長女也性溫柔恭順動以禮法景思常為軍校與宣祖同居護聖營晉開運初宣祖為太祖聘焉周顯德三年太祖為定國軍節度使封會稽郡夫人生秦國晉國二公主魏王德昭五年寢疾薨年三十建隆三年四月詔追冊為皇后乾德二年三月有司上謚曰孝惠四月葬安陵西北神主享于別廟神宗時與孝章淑德章懷並祔太廟

孝明王皇后邠州新平人彰德軍節度饒第三女孝

惠崩周顯德五年太祖為殿前都點檢聘后為繼室  
后恭勤不懈仁慈御下周世宗賜冠帔封琅邪郡夫  
人太祖即位建隆元年八月冊為皇后常服寬衣佐  
御膳善彈箏鼓琴晨起誦佛書事杜太后得驪心生  
子女三人皆夭乾德元年十二月崩年二十二有司  
上謚翰林學士竇儀撰哀冊文二年四月墓安陵之  
北神主享于別廟太平興國二年祔享太廟

孝章宋皇后河南洛陽人左衛上將軍偓之長女也  
母漢永寧公主后幼時隨母入見周太祖賜冠帔乾  
德五年太祖召見復賜冠帔時偓任華州節度后隨

母歸鎮孝明后崩復隨母來賀長春節開寶元年二月遂納入宮為皇后年十七性柔順好禮每帝視朝退常具冠帔候接佐御饌太祖崩號開寶皇后太平興國二年居西宮雍熙四年移居東宮至道元年四月崩年四十四有司上謚權殯普濟佛舍三年正月祔葬永昌陵北命吏部侍郎李至撰哀冊文神主享于別廟神宗時升祔太廟

太宗淑德尹皇后相州鄴人滁州刺史廷勛之女兒崇珂保信軍節度太宗在周時娶焉早薨及帝即位詔追冊為皇后并謚葬孝明陵西北神主享于別廟

後升祔太廟

懿德符皇后陳州宛丘人魏王彥卿第六女也周顯德中歸太宗建隆初封汝南郡夫人進封楚國夫人太宗封晉王改越國開寶八年薨年三十四葬安陵西北帝即位追冊為皇后謚懿德享于別廟至道三年十一月詔有司議太宗配宰相請以后配詔從之奉神主升祔太廟后姊周世宗后也淳化四年殂明德李皇后潞州上黨人淄州刺史虔耘第二女開寶中太祖為太宗聘為妃既納幣會太祖崩至太平興國三年始入宮年十九雍熙元年十二月詔立為

皇后性恭謹莊肅撫育諸子及嬪御甚厚嘗生皇子不育至道二年封后嫡母吳氏為衛國太夫人後改封楚國及封后母陳氏為韓國太夫人太宗崩真宗即位至道三年四月尊后為皇太后居西宮嘉慶殿咸平二年宰相請別建宮立名從之四年宮成移居之仍上宮名曰萬安景德元年崩年四十五謚明德權殯沙臺三年十月祔塋永熙陵禮官請以懿德明德同祔太宗廟室以先後為次從之

李賢妃真定人乾州防禦使英之女也太祖聞妃有容德為太宗聘之開寶中封隴西郡君太宗即位進

夫人生皇女二人皆早亡次生楚王元佐妃嘗夢日  
輪逼已以裾承之光耀遍體驚而悟遂生真宗太平  
興國二年薨年三十四真宗即位追封賢妃又進上  
尊號為皇太后有司上謚曰元德咸平三年祔葬永  
熙陵以中書侍郎平章事李沆為園陵使車駕詣普  
安院攢宮素服行禮拜伏嗚咽命駕部郎中知制誥  
梁周翰撰哀冊神主祔別廟大中祥符元年追贈后  
父英檢校太尉安國軍節度常山郡王母魏國太夫  
人大中祥符三年禮官趙湘請以后祔太宗廟室真  
宗曰此重事也俟令禮官議之六年秋宰相王旦與

群臣表請后尊號中去太字升祔太廟明德之次從之

真宗章懷潘皇后大名人忠武軍節度美第八女真宗在韓邸太宗為聘之封莒國夫人端拱二年五月薨年二十二真宗即位追冊為皇后謚莊懷葬永昌陵之側陵名保泰神主享于別廟舊制后謚冠以帝謚慶曆中禮官言孝字連太祖謚德字連太宗謚遂改莊為章以連真宗謚云

章穆郭皇后太原人宣徽南院使守文第二女淳化四年真宗在襄邸太宗為聘之封魯國夫人進封秦

國真宗嗣位立為皇后景德四年從幸西京還以疾崩年三十二后謙約惠下性惡奢靡族屬入謁禁中服飾華侈必加戒勗有以家事求言於上者后終不許兄子出嫁以貧欲祈恩賚但出裝具給之上尤加禮重及崩上深嗟悼禮官奏皇帝七日釋服特詔增至十三日太常上謚曰莊穆靈駕發引命翰林學士楊億撰哀冊葬永熙陵之西北神主享于別廟以后弟崇儀副使崇仁為莊宅使康州刺史姪承慶承壽皆遷官大中祥符中封后母高唐郡太夫人梁氏萊國太夫人仁宗即位升祔真宗廟室改謚章穆

字四百三十个  
史身列傳卷第一  
區 二一 刑

章獻明肅劉皇后其先家太原後徙益州為華陽人  
祖延慶在晉漢間為右驍衛大將軍父通虎捷都指  
揮使嘉州刺史從征太原道卒右通第二女也初母  
龐夢月入懷已而有娠遂生后后在襁褓而孤鞠於  
外氏善播鼈蜀人龔美者以鍛銀為業攜之入京師  
后年十五入襄邸王乳母秦國夫人性嚴整因為太  
宗言之令王斥去王不得已置之王宮指使張耆家  
太宗崩真宗即位入為美人以其無宗族乃更以美  
為兄弟改姓劉大中祥符中為修儀進德妃自章穆  
崩真宗欲立為皇后大臣多以為不可帝卒立之李

宸妃生仁宗后以為己子與楊淑妃撫視甚至后性  
警悟曉書史聞朝廷事能記其本末真宗退朝闕天  
下封奏多至中夜后皆預聞宮闈事有問輒傳引故  
實以對天禧四年帝久疾居宮中事多決於后宰相  
寇準密議奏請皇太子監國以謀泄罷相用丁謂代  
之既而入內都知周懷政謀廢后殺謂復用準以輔  
太子客省使楊崇勳內殿承制楊懷吉詣謂告謂夜  
乘犢車挾崇勳懷吉造樞密使曹利用謀明日誅懷  
政貶準衡州司馬於是詔皇太子開資善堂引大臣  
決天下事后裁制於內真宗崩遺詔尊后為皇太后

軍國重事權取處分謂等請太后御別殿太后遣張景宗雷允恭諭曰皇帝視事當朝夕在側何須別御一殿於是請帝與太后五日一御承明殿帝位左太后位右垂簾決事議已定太后忽出手書第欲禁中閱章奏遇大事即召對輔臣其謀出於丁謂非太后意也謂既貶馮拯等三上奏請如初議帝亦以為言於是始同御承明殿百官表賀太后哀慟有司請制令稱吾以生日為長寧節出入御大安輦鳴鞭侍衛如乘輿令天下避太后父諱群臣上尊號曰應元崇德仁壽慈聖太后御文德殿受冊天聖五年正旦太

后御會慶殿群臣及契丹使者班廷中帝再拜跪上  
壽是歲郊祀前出手書諭百官毋請加尊號禮成帝  
率百官恭謝如元日七年冬至天子又率百官上壽  
范仲淹力言其非不聽九月詔長寧節百官賜衣天  
下賜宴皆如乾元節明道元年冬至復御文德殿有  
司陳黃麾仗設宮架登歌二舞明年帝親耕籍田太  
后亦謁太廟乘玉輅服禕衣九龍花釵冠齋于廟簣  
明服衮衣十章減宗彝藻去劍冠儀天前後垂珠翠  
十旒薦獻七室皇太妃亞獻皇后終獻加上尊號曰  
應天齊聖顯功崇德慈仁保壽太后是歲崩年六十

計字四百二十个  
五謚曰章獻明肅葬于永定陵之西北舊制皇后皆  
二謚稱制加四謚自后始追贈三世皆至太師尚書  
令兼中書令父封魏王初仁宗即位尚少太后稱制  
雖政出宮闈而號令嚴明恩威加天下左右近習亦  
少所假借宮掖間未嘗妄改作內外賜與有節柴氏  
李氏二公主入見猶服髮髻太后曰姑老矣命左右  
賜以珠璣帕首時潤王元份婦安國夫人李氏老髮  
且落見太后亦請帕首太后曰大長公主太宗皇帝  
女先帝諸妹也若趙家老婦寧可比耶舊賜大臣茶  
有龍鳳飾太后曰此豈人臣可得命有司別製入香

京挺以賜之賜族人御食必易以鈿噐曰尚方噐勿使入吾家也常服絀繻練裙侍者見仁宗左右簪珥珍麗欲效之太后戒曰彼皇帝嬪御飾也汝安得學先是小臣方仲弓上書請依武后故事立劉氏廟而程琳亦獻武后臨朝圖后擲其書于地曰吾不作此負祖宗事有漕臣劉綽者自京西還言在庾有出賸糧千餘斛乞付三司后問曰卿識王曾張知白呂夷簡魯宗道乎此四人豈因獻羨餘進哉后稱制凡十一年自仁宗即位乃諭輔臣曰皇帝聽斷之暇宜詔名儒講習經史以輔其德於是設幄崇政殿之西廡

而日命近臣侍講讀丁謂曹利用既以侮權貶竄而天下惕然畏之晚稍進外家任內宮羅崇勳江德明等訪外事崇勳等以此勢傾中外兄子從德死姻戚門人廝役拜官者數十人御史曹脩古楊偕郭勸段少連論奏太后悉逐之太后保護帝既盡力而仁宗所以奉太后亦甚備上春秋長猶不知為宸妃所出終太后之世無毫髮間隙焉及不豫帝為大赦悉召天下醫者馳傳詣京師諸嘗為太后謫者皆內徙死者復其官其後言者多追詆太后時事范仲淹以為言上曰此朕所不忍聞也下詔戒中外毋輒言於是

泰寧軍節度使錢惟演請以章獻章懿與章穆並祔  
真宗室詔三省與禮院議皆以謂章穆皇后位崇中  
壺已祔真宗廟室自協一帝一后之文章獻明肅處  
坤元之尊章懿感日符之貴功德莫與為比謂宜崇  
建新廟同殿異室歲時薦饗一用太廟之儀仍別立  
廟名以崇世享翰林學士馮元等請以奉慈為名詔  
依慶曆五年禮院言章獻章懿二后請遵國朝懿德  
明德元德三后同祔太宗廟室故事遷祔真宗廟詔  
兩制議翰林學士王堯臣等議請遷三后祔序於章穆之  
次從之

李宸妃杭州人也祖延嗣仕錢氏為金華縣主簿父  
仁德終左班殿直初入宮為章獻太后侍兒莊重寡  
言真宗以為司寢既有娠從帝臨砌臺玉釵墜妃惡  
之帝心卜釵完當為男子左右取以進釵果不毀帝  
甚喜已而生仁宗封崇陽縣君復生一女不育進才  
人後為婉儀仁宗即位為順容從守永定陵章獻太  
后使劉美張懷德為訪其親屬得其弟用和補三班  
奉職初仁宗在襁褓章獻以為己子使楊淑妃保視  
之仁宗即位妃嘿處先朝嬪御中未嘗自異人畏太  
后亦無敢言者終太后世仁宗不自知為妃所出也

明道元年疾革進位宸妃薨年四十六初章獻太后欲以宮人禮治喪於外丞相呂夷簡奏禮宜從厚太后遽引帝起有頃獨坐簾下召夷簡問曰一宮人死相公云云何歟夷簡曰臣待罪宰相事無內外無不當預太后怒曰相公欲離間吾母子耶夷簡從容對曰陛下不以劉氏為念臣不敢言尚念劉氏則喪禮宜從厚太后悟遽曰宮人李宸妃也且柩何夷簡乃請治喪用一品禮殯洪福院夷簡又謂入內都知羅崇勳曰宸妃當以后服殮用水銀實棺異時勿謂夷簡未嘗道及崇勳如其言後章獻太后崩燕王為仁

計字四百十  
宗言陛下乃李宸妃所生妃死以非命仁宗號慟頓  
毀不視朝累日下哀痛之詔自責尊宸妃為皇太后  
謚莊懿幸洪福寺祭告易梓宮親哭視之妃玉色如  
生冠服如皇太后以水銀養之故不壞仁宗嘆曰人  
言其可信哉遇劉氏加厚陪葬永定陵廟曰奉慈又  
即景靈宮建神御殿曰廣孝慶曆中改謚章懿升祔  
太廟拜用和為彰信軍節度使檢校侍中寵賚甚渥  
既而追念不已顧無以厚其家乃以福康公主下嫁  
用和之子瑋

楊淑妃益州郫人祖瑄父知儼知儼弟知信隸禁軍

為天武副指揮使妃年十二入皇子宫真宗即位拜  
才人又拜婕妤進婉儀仍詔婉儀升從一品位昭儀  
上帝東封西祀凡巡幸皆從章獻太后為脩儀妃與  
之位幾埒而妃通敏有智思奉順章獻無所忤章獻  
親愛之故妃雖貴幸終不以為已間後加淑妃真宗  
崩遺制以為皇太后始仁宗在乳祿章獻使妃護視  
凡起居飲食必與之俱所以擁佑扶持恩意勤備及  
帝即位嘗召其姪永德見禁中欲授以諸司副使妃  
辭曰小兒豈勝大恩小官可也更命為右侍禁章獻  
遺誥尊為皇太后居宮中與皇帝同議軍國事閤門

趣百僚賀御史中丞蔡齊目臺吏毋追班乃入白執  
政曰上春秋長習知天下情僞今始親政事豈宜使  
女后相繼稱制乎乃詔刪去遺誥同議軍國事語第  
存后號奉緡錢二萬助湯沐後名其所居宮曰保慶  
稱保慶皇太后景祐三年無疾而薨年五十三殯於  
皇儀殿帝思其保護之恩命禮官議加服小功初仁  
宗未有嗣后每勸帝擇宗子近屬而賢者養于宮中  
其選即英宗也英宗立言者謂禮慈母於子祭於孫  
止請廢后廟瘞其主園陵英宗弗欲遽也下有司  
議未上會帝崩遂罷后父祖皆累贈至一品知信贈

節度使知信子景宗見外戚傳

沈貴妃宰相倫之孫父繼宗光祿少卿大中祥符初以將相家子被選初為才人歷美人婕妤充媛至德妃為人淑儉不華帝亦以妃家世故待之異衆長秋虛位帝欲立之有從中沮之者不果嘉祐末進貴妃熙寧九年薨年八十三許出殯其家車駕臨奠輟視朝三日謚昭靜

仁宗郭皇后其先應州金城人平盧軍節度使崇之孫也天聖二年立為皇后初帝寵張美人欲以為后章獻太后難之后既立而頗見踈其後尚美人楊美

字四百令六不  
人俱幸數與后忿爭一日尚氏於上前有侵后語后  
不勝忿批其頰上自起救之誤批上頸上大怒入內  
都知閻文應因與上謀廢后且勸帝以爪痕示執政  
上以示呂夷簡且告之故夷簡亦以前罷相怨后乃  
曰古亦有之后遂廢詔封為淨妃玉京冲妙仙師賜  
名清悟居長樂宮於是中丞孔道輔諫官御史范仲  
淹段少連等十人伏閣言后無過不可廢道輔等俱  
被黜責景祐元年出居瑤華宮而尚美人亦廢於洞  
真宮入道楊美人別宅安置又賜后號金庭教主冲  
靜元師後帝頗念之遣使存問賜以樂府后和荅之

辭甚愴惋帝嘗密令召入后曰若再見召者須百官  
立班受冊方可屬小疾遣文應挾醫診視數日乃言  
后暴薨中外疑閻文應進毒而不得其實上深悼之  
追復皇后而停謚冊祔廟之禮

慈聖光獻曹皇后真定人樞密使周武惠王彬之孫  
也明道二年郭后廢詔聘入宮景祐元年九月冊為  
皇后性慈儉重稼穡常於禁苑種穀親蚕善飛帛書  
慶曆八年閏正月帝將以望夕再張燈后諫止後三  
日衛卒數人作亂夜越屋叩寢殿后方侍帝聞變遽  
起帝欲出后閉閣擁持趣呼都知王守忠使引兵入

賊傷宮嬪殿下聲徹帝所宦者以乳嫗歐小女子給  
奏后叱之曰賊在近殺人敢妄言耶后度賊必縱火  
陰遣人挈水踵其後果舉炬焚簾水隨滅之是夕所  
遣宦侍后皆親剪其髮諭之曰明日行賞用是為驗  
故爭盡死力賊即禽滅閣內妾與卒亂當誅祈哀幸  
姬姬言之帝貸其死后具衣冠見請論如法曰不如  
是無以肅清禁掖帝命坐后不可立請移數刻卒誅  
之張妃怙寵上僭欲假后盖出游帝使自來請后與  
之無靳色妃喜還以告帝曰國家文物儀章上下有  
秩汝張之而出外廷不汝置妃不懌而輟英宗方四

歲育禁中后拊鞠周盡迨入為嗣子贊策居多帝夜  
暴疾崩后悉斂諸門鑰寘於前召皇子入及明宰臣  
韓琦等至奉英宗即位尊后為皇太后帝感疾請權  
同處分軍國事御內東門小殿聽政大臣日奏事有  
疑未決者則曰公輩更議之未嘗出已意頗涉經史  
多援以決事中外章奏日數十一一能紀綱要檢柅  
曹氏及左右臣僕毫分不以假借宮省肅然明年夏  
帝疾益愈即命撤簾還政帝持書久不下及秋始行  
之敕有司崇峻典禮以弟侑同中書門下平章事神  
宗立尊為太皇太后名宮曰慶壽帝致極誠孝所以

承迎娛悅無所不盡從行登翫每先後策掖后亦慈愛天至或退朝稍晚必自至屏扆候矚間親持饌飲以食帝外家男子舊毋得入謁后春秋高佾亦老帝數言宜使入見輒不許他日佾侍帝帝復為請乃許之因偕詣后閣少焉帝先起若令佾得伸親親意后遽曰此非汝所當得留趣遣出晚得水疾侍醫莫能治元豐二年冬疾甚帝視疾寢門衣不解帶旬日崩年六十四帝推恩曹氏拜佾中書令進官者四十餘人初王安石當國變亂舊章后乘間語神宗謂祖宗法度不宜輕改熙寧宗祀前數日帝至后所后曰吾

昔聞民間疾苦必以告仁宗因赦行之今亦當尔帝  
曰今無他事后曰吾聞民間甚苦青苗助役宜罷之  
安石誠有才學然怨之者甚衆帝欲愛惜保全之不  
若暫出之於外帝悚聽垂欲止復為安石所持遂不  
果帝嘗有意於燕薊已與大臣定議乃詣慶壽宮白  
其事右曰儲蓄賜予備乎鎧仗士卒精乎帝曰固已  
辦之矣右曰事體至大吉凶悔吝生乎動得之不過  
南面受賀而已萬一不諧則生靈所係未易以言苟  
可取之太祖太宗收復久矣何待今日帝曰敢不受  
教蘇軾以詩得罪下御史獄人以為必死后違豫中

聞之謂帝曰嘗憶仁宗以制科得軾兄弟喜曰吾為子孫得兩宰相今聞軾以作詩繫獄得非仇人中傷之乎摅至於詩其過微矣吾疾勢已薦不可以寃濫致傷中和宜熟察之帝涕泣軾由此得免及崩帝哀慕毀瘠殆不勝喪有司上謚葬于永昭陵

張貴妃河南永安人也祖穎進士第終建平令父堯封亦舉進士為石州推官卒時堯封兄堯佐補蜀官堯封妻錢氏求挈孤幼隨之官堯佐不收恤以道遠辭妃幼無依錢氏遂納于章惠皇后宮寢長得幸有盛寵妃巧慧多智數善承迎勢動中外慶曆元年封

清河郡君歲中為才人遷修媛忽被疾曰妾姿薄不勝寵名願為美人許之皇祐初進貴妃後五年薨年三十一仁宗哀悼之追冊為皇后謚溫成追封堯封清河郡王謚景思而堯佐因緣僥倖致位通顯云

苗貴妃開封人父繼宗母許先為仁宗乳保出嫁繼宗帝登位得復通籍妃以容德入侍生唐王昞福康公主封仁壽郡君拜才人昭容德妃英宗育於禁中妃擁佑頗有恩既踐阼疇其前勞進貴妃贈其父至太師吳國公母陳楚國夫人福康下嫁當貶恩外家抑不肯言元祐六年薨年六十九哲宗輟朝出奠發

字三頁八十二下  
哀苑中謚曰昭節

周貴妃開封人生四歲從其姑入宮張貴妃育為女  
稍長遂得侍仁宗生兩公主帝崩妃日一蔬食屏處  
一室誦佛書困則假寐覺則復誦晝夜不解衣者四  
十年公主下嫁錢景臻郭獻卿連進至賢妃徽宗立  
加貴妃歷五朝勤約一致啓壽藏於周氏塋南傍建  
僧屋費緡錢六萬皆貯儲奉賜郭公主先亡詔許出  
外第與親戚相往來年九十三薨謚昭淑

楊德妃定陶人天聖中以章獻太后姻連選為御侍  
封原武郡君進美人端麗機敏妙音律組紉書藝一

過目如素習父忠為侍禁仁宗欲加獎擢辭曰外官當積勞以取貴今以恩澤徼倖恐啓左右諛謁之端帝悅命徙居肅儀殿贈其祖貴州刺史而官其叔弟五人積與郭后不相能后既廢妃亦遣出後復召為婕妤好歷脩媛脩儀熙寧五年薨年五十四贈德妃馮賢妃東平人曾祖炳知雜御史祖起兵部侍郎妃以良家女九歲入宮及長得侍仁宗生邢魯國二公主封始平郡君帝將登其品秩力辭不拜養女林美人得幸神宗生二王而没王尚幼妃保育如己子累加才人婕妤脩容在禁掖幾六十年始終五朝動循

字四百个  
禮度薨年七十七贈賢妃

英宗宣仁聖烈高皇后亳州蒙城人曾祖瓊祖繼勳皆有勲王室至節度使母曹氏慈聖光獻妃姊也故后少鞠宮中時英宗亦在帝所與后年同仁宗謂慈聖異日必以為配既長遂成昏濮即生神宗皇帝岐王顥嘉王顥壽康公主治平二年冊為皇后后弟殿內崇班士林供奉父帝欲遷其官后謝曰士林獲升朝籍分量已過豈宜援先后家比辭之神宗立尊為皇太后居寶慈宮帝累欲為高氏營大第后不許久之但斥望春門外隙地以賜凡營繕百役費悉出寶

慈不調大農一錢元豐八年帝不豫浸劇宰執王珪等入問疾乞立延安郡王為皇太子太后權同聽政帝頷之珪等見太后簾下后泣撫王曰兒孝順自官家服藥未嘗去左右書佛經以祈福喜學書已誦論語七卷絕不好弄乃令王出簾外見珪等珪等再拜謝且賀是日降制立為皇太子初岐嘉二王日問起居至是令毋輒入又陰敕中人梁惟簡使其妻製十歲兒一黃袍懷以來蓋密為踐阼倉卒備也哲宗嗣位尊為大皇太后驛召司馬光呂公著未至迎問今日設施所宜先未及條上已散遣脩京城役夫減皇

城覘卒止禁庭工技廢導洛司出近侍尤亡狀者戒  
中外毋苛歛寬民間保戶馬事由中旨王珪等弗預  
知又起文彥博於既老遣使勞諸途諭以復祖宗法  
度為先務且令亟䟽可用者從父遵裕坐西征失律  
抵罪蔡確欲獻諛以固位乞復其官后曰遵裕靈武  
之役塗炭百萬先帝中夜得報起環榻行徹旦不能  
寐聖情自是驚悸馴致大故禍由遵裕得免刑誅幸  
矣先帝肉未冷吾何敢顧私恩而違天下公議確悚  
慄而止光公著至並命為相使同心輔政一時知名  
士彙進於廷凡熙寧以來政事弗便者次第罷之於

是以常平舊式改青苗以嘉祐差役參募役除市易之法道茶鹽之禁舉邊砦不毛之地以賜西戎而宇內復安契丹主戒其臣下復勿生事於疆場曰南朝盡行仁宗之政矣蔡確坐車蓋亭詩謫嶺表后謂大臣曰元豐之末吾以今皇帝所書佛經出示人是時惟王珪曾奏賀遂定儲極且以子繼父有何間言而確自謂有定策大功妄扇事端規為異時眩惑地吾不忍明言姑託訕上為名逐之耳此宗社大計姦邪怨謗所不暇恤也廷試舉人有司請循天聖故事帝后皆御殿后止之又請受冊寶於文德后曰母后當

陽非國家美事况天子正衙豈所當御就崇政足矣  
上元燈宴后母當入觀止之曰夫人登樓上必加禮  
是由吾故而越典制於心殊不安但令賜之燈燭遂  
歲以為常姪公繪公紀當轉觀察使力遏之帝請至  
再僅遷一秩終后之世不敢改又以官冗當汰詔損  
外氏恩四之一以為宮掖先臨政九年朝廷清明華  
夏綏定宋用臣等既被斥祈神宗乳媪入言之冀得  
復用后見其來曰汝來何為得非為用臣等游說乎  
且汝尚欲如曩日求內降干撓國政耶若復爾吾即  
斬汝媪大懼不敢出一言自是內降遂絕力行故事

抑絕外家私恩文思院奉上之物無問巨細終身不  
取其一人以為女中堯舜元祐八年九月屬疾崩年  
六十二後二年章惇蔡卞邢恕始造為不根之謗皇  
太后太妃力辨其誣事乃已語在恕傳至高宗時昭  
暴惇卞恕罪褒錄后家贈曹夫人為魏魯國夫人弟  
士遜士林及公繪公紀皆追王擢從孫世則節度使  
他受恩者又十餘人云

列傳卷第一

陳國卷一百五十一

謝安恩條又十餘人云

士鄉士林文公會公臨督彭王

奉對才感罪奔疑京察觀曹夫人為路

才言不出也韓其臨事八日醉其然則至高宗拜

六十二卷二章章對蔡才研醫設此為不辨之類是

以其一八以為其中表與示於八章亦且為無前五

中與不察以恩文恩謝奉山之歸無聞耳臨然與不

列傳卷第二

宋史二百四十三

開府儀同三司桂國錄軍國事兼書右丞相樞密國史領經筵事都總裁脫等奉

勅修

后妃下

神宗欽聖獻肅向皇后

欽成朱皇后

欽慈陳皇后

林賢妃

武賢妃

哲宗昭慈孟皇后

昭懷劉皇后

徽宗顯恭王皇后

鄭皇后

王貴妃

韋賢妃

字二百  
喬貴妃

劉貴妃

欽宗朱皇后

高宗憲節邢皇后

憲聖慈烈吳皇后

潘賢妃

張賢妃

劉貴妃

劉婉儀

張貴妃

孝宗成穆郭皇后

成恭夏皇后

成肅謝皇后

蔡貴妃

李賢妃

光宗慈懿李皇后

黃貴妃

寧宗恭淑韓皇后

恭聖仁烈楊皇后

理宗謝皇后

度宗全皇后

楊淑妃

神宗欽聖憲肅向皇后河內人故宰相敏中曾孫也  
治平三年歸于穎邸封安國夫人神宗即位立為皇  
后帝不豫后贊宣仁后定建儲之議哲宗立尊為皇  
太后宣仁命葺慶壽故宮以居后后辭曰安有姑居  
西而婦處東瀆上下之分不敢徙遂以慶壽後殿為  
隆祐宮居之帝將卜后及諸王納婦后敕向族勿以  
女寘選中族黨有欲援例以恩換閣職及為選人求

京秩者且言有特旨后曰吾族未省用此例何庸以私情撓公法一不與帝倉卒晏駕獨決策迎端王章惇異議不能沮徽宗立請權同處分軍國事后以長君辭帝泣拜移時乃聽凡紹聖元符以還惇所斥逐賢大夫士稍稍收用之故事有如御正殿避家諱立誕節之類皆不用至聞賓召故老寬徭息兵愛民崇儉之舉則喜見于色纔六月即還政明年正月崩年五十六帝追念不已乃數加恩兩舅宗良宗回皆位開府儀同三司封郡王而自敏中以上三世亦追列王爵非常典也

欽成朱皇后開封人父崔傑早世母李更嫁朱士安  
后鞠於所親任氏熙寧初入宮為御侍進才人婕妤  
生哲宗及蔡王以徐國公主累進德妃哲宗即位尊  
為皇太妃時宣仁欽聖二太后皆居尊故稱號未極  
元祐三年宣仁詔春秋之義母以子貴其尋繹故實  
務致優隆於是輿蓋仗衛冠服悉侔皇后紹聖中欽  
聖復命即閣建殿改乘車為輿出入由宣德東門百  
官上牋稱殿下名所居為聖瑞宮贈崔任朱三父皆  
至師保徽宗立奉禮尤謹崇寧元年二月薨年五十  
一追冊為皇太后上尊謚陪葬永裕陵

欽慈陳皇后開封人幼穎悟莊重選入掖庭為御侍  
 生徽宗進美入帝崩守陵殿思顧舊恩毀瘠骨立左  
 右進粥藥揮使去曰得早侍先帝願足矣未幾薨年  
 三十二建中靖國元年追冊為皇太后上尊謚陪葬  
 永裕陵

林賢妃南劍人三司使特之孫司農卿洙之女幼選  
 入宮既長遂得幸封永嘉郡君升美人生燕王俛越  
 王偲邢國公主進婕妤元祐五年薨詔用一品禮葬  
 贈貴儀又贈賢妃

武賢妃始以選入宮元豐五年進才人生吳王佖賢

和公主歷美人婕妤徽宗即位進昭儀賢妃大觀元年薨乘輿臨奠輟朝三日謚曰惠穆

哲宗昭慈聖獻孟皇后洺州人眉州防禦使馬軍都虞候贈太尉元之孫女也初哲宗既長宣仁高太后歷選世家女百餘入宮后年十六宣仁及欽聖向太后皆愛之教以女儀元祐七年諭宰執孟氏子能執婦禮宜正位中宮命學士草制又以近世禮儀簡畧詔翰林臺諫給舍與禮官議冊后六禮以進至是命尚書左僕射呂大防攝太尉充奉迎使同知樞密院韓忠彥攝司徒副之尚書左丞蘇頌攝太尉充發策

四百一十四  
使僉書樞密院事王巖叟攝司徒副之尚書右丞蘇  
轍攝太尉充告期使皇叔祖同知大宗正事宗景攝  
宗正卿副之皇伯祖判大宗正事高密郡王宗晟攝  
太尉充納成使翰林學士范百祿攝宗正卿副之吏  
部尚書王存攝太尉充納吉使權戶部尚書劉奉世  
攝宗正卿副之翰林學士梁燾攝太尉充納采問名  
使御史中丞鄭雍攝宗正卿副之帝親御文德殿冊  
為皇后宣仁太后語帝曰得賢內助非細事也進后  
父閣門祗候在為崇儀使滎州刺史母王氏華原郡  
君久之劉婕妤有寵紹聖三年后朝景靈宮訖事就

坐諸嬪御立侍劉獨背立簾下后閣中陳迎兒呵之  
不顧閣中皆忿冬至日會朝欽聖太后於隆祐宮后  
御坐朱髹金飾宮中之制惟后得之婕妤在他坐有  
愠色從者為易坐製與后等衆弗能平因傳唱曰皇  
太后出后起立劉亦起尋各復其所或已撤婕妤坐  
遂仆于地對不復朝泣訴于帝內侍郝隨謂婕妤曰  
毋以此戚戚願為大家早生子此坐正當為婕妤有  
也會后女福慶公主疾后有姊頗知醫嘗已后危疾  
以故出入禁掖公主藥弗效持道家治病符水入治  
后驚曰姊寧知宮中禁嚴與外間異邪令左右藏之

俟帝至具言其故帝曰此人之常情耳后即執符於帝前宮禁相傳厭魅之端作矣未幾后養母聽宣夫人燕氏尼法端與供奉官王堅為后禱祠事聞詔入內押班梁從政管當御藥院蘇珪即皇城司鞠之捕逮宦者宮妾幾三十人榜掠備至肢體毀折至有斷舌者獄成命侍御史董敦逸覆錄罪人過庭下氣息僅屬無一人能出聲者敦逸秉筆疑未下郝隨等以言脅之敦逸畏禍及己乃以奏牘上詔廢后出居瑤華宮號華陽教主王清妙靜仙師法名沖真初章惇誣宣仁后有廢立計以后逮事宣仁惇又陰附劉賢

妃欲請建為后遂與郝隨構成是獄天下寃之敦逸  
奏言中宮之廢事有所因情有可察詔下之日天為  
之陰翳是天不欲廢后也人為之流涕是人不欲廢  
后也且言嘗覆錄獄事恐得罪天下後世帝曰敦逸  
不可更在言路曾布曰陛下本以皇城獄出於近習  
推治故命敦逸錄問今乃貶錄問官何以取信中外  
乃止帝久亦悔之曰章惇誤我元符末欽聖太后將  
復后位適有布衣上書以后為言者即命以官於是  
詔后還內號元祐皇后時劉虢元符皇后故也崇寧  
初郝隨諷蔡京再廢后昌州判官馮儼上書言后不

得復臺臣錢適石豫左膚等連章論韓忠彥等信一  
布衣狂言復已廢之后以掠虛美望斷以大義蔡京  
與執政許將溫益趙挺之張商英皆主其說徽宗從  
之詔依紹聖詔旨復居瑤華宮加賜希微元通知和  
妙靜仙師靖康初瑤華宮火徙居延寧宮又火出居  
相國寺前之私第金人圍汴欽宗與近臣議再復后  
尊為元祐太后詔未下而京城陷時六宮有位號者  
皆北遷后以廢獨存張邦昌僭位尊后為宋太后迎  
居延福宮受百官朝胡舜陟馬伸又言政事當取后  
旨邦昌乃復上尊號元祐皇后迎入禁中垂簾聽政

后聞康王在濟遣尚書左右丞馮澥李回及兄子忠厚持書奉迎命副都指揮使郭仲荀將所部扈衛又命御營前軍統制張俊逆于道尋降手書播告天下王至南京后遣宗室士儂及內侍邵成章奉圭寶乘輿服御迎王即皇帝位改元后以是日撤簾尊后為元祐太后尚書省言元字犯后祖名請易以所居宮名遂稱隆祐太后上将幸楊州命仲荀衛太后先行駐揚州州治會張浚請先定六宮所居地遂詔忠厚奉太后幸杭州以苗傅為扈從統制踰年傅與劉正彥作亂請太后聽政又請立皇子太后諭之曰自蔡

京王黼更祖宗法童貫起邊事致國家禍亂今皇帝無失德止為黃潛善汪伯彥所誤皆已逐矣傅等言必立皇太子太后曰今強敵在外我以婦人抱三歲小兒聽政將何以令天下傅等泣請太后力拒之帝聞事急詔禪位元子太后垂簾聽政朱勝非請令臣僚得獨對論機事仍日引傅黨一人上殿以釋其疑太后從之每見傅等曲加慰撫傅等皆喜韓世忠妻梁氏在傅軍中勝非以計脫之太后召見勉令世忠速來以清巖陞梁氏馳入世忠軍諭太后意世忠等遂引兵至逆黨懼朱勝非等誘以復辟命王世修草

狀進呈太后喜曰吾責塞矣再以手札趣帝還宮即欲撤簾帝令勝非請太后一出御殿乃命撤簾是日上皇太后尊號太后聞張浚忠義欲一見之帝為召浚至禁中承議郎馮楫嘗貽書苗傅勸復辟上未之知太后白其事楫得遷秩帝幸建寧命僉書樞密院事鄭穀衛太后繼發比至帝率群臣迎于郊會防秋迫命劉寧止制置江浙衛太后往洪州百司非預軍事者悉從仍命滕康劉珪權知三省樞密院事從行凡四方奏讞吏部差注舉辟功賞之類皆隸焉復命四廂都指揮使楊惟忠將兵萬人衛從帝慮敵人來

侵密諭康珏緩急取太后旨便宜以行過落星寺舟覆宮人溺死者十數惟太后舟無虞既至洪州議者言金人自蘄黃渡江陸行二百餘里即到洪州帝憂之命劉光世屯江州光世不為備金人遂自大冶縣徑趣洪州康珏奉太后行次吉州金人追急太后乘舟夜行質明至太和縣舟人景信反揚惟忠兵潰失宮人一百六十康珏俱遁兵衛不滿百遂往虔州太后及潘妃以農夫肩輿而行帝慮太后徑入閩廣遣使歷詢后所在及知在虔州遂命中書舍人李正民來朝謁時虔州府庫皆空衛軍所給惟得沙錢市買

不售與百姓交鬪縱火肆掠土豪陳新率衆圍城康  
珏惟忠弗能禁惟忠步將胡友自外引兵破新于城  
下新乃去帝聞罷康珏命盧益李回代之諭輔臣曰  
朕初不識太后自迎至南京愛朕不啻已出今在數  
千里外兵馬驚擾當亟奉迎以愜朕朝文慕念之意  
遂遣御營司都統辛企宗帶御器械潘永思迎歸太  
后至越帝親迎于行宮門外遍問所過守臣治狀入  
宮禁中嘗微苦風眩有宮人自言善符呪疾良已太  
后驚曰吾豈敢復聞此語耶立命出之太后生辰置  
酒宮中從容謂帝曰宣仁太后之賢古今母后未有

其比昔奸臣肆為謗誣雖嘗下詔明辨而國史尚未  
剛定豈足傳信吾意在天之靈不無望於帝也帝聞  
之悚然後廼更脩神宗哲宗實錄始得其正而奸臣  
情狀益著帝事太后極孝雖帷帳皆親視或得時果  
必先獻太后然後敢嘗宣教郎范燾與忠厚有憾誣  
與太后密養欽宗子帝曰朕於太后如母子安得有  
此即治其罪紹興五年春患風疾帝旦暮不離左右  
衣弗解帶者連夕四月崩於行宮之西殿年五十九  
遺命擇地攢殯俟軍事寧歸葬園陵帝詔曰朕以繼  
體之重當從重服凡喪祭用母后臨朝禮上尊號曰

昭慈獻烈皇太后推恩外家凡五十人殯于會稽上  
皇村附神主于哲宗室位在昭懷皇后上三年改謚  
昭慈聖獻后性節儉謙謹有司月供千緡而止幸南  
昌斥賣私絹三千匹充費尋詔文書應奏者避后父  
名不許群臣請上太皇太后號亦不許忠厚直顯謨  
閣臺諫給舍文章論列后聞即令易武命學士院降  
詔戒敕忠厚等不得預聞朝政通貴近至私第謁見  
宰執以恩澤當得官者近八十員后未嘗陳請初后  
受冊日宣仁太后歎曰斯人賢淑惜福薄耳異日國  
有事變必此人當之後皆如所云

昭懷劉皇后初為御侍明豔冠後庭且多才藝由美人婕妤進賢妃生一子二女有盛寵能順意奉兩宮時孟后位中宮后不循列妾禮且陰造竒語以售謗內侍郝隨劉友端為之用孟后既廢后竟代焉右正言鄒浩上疏極諫坐竄徽宗立冊為元符皇后明年尊為太后名宮崇恩帝緣哲宗故曲加恩禮后以是頗干預外事且以不謹聞帝與輔臣議將廢之而后已為左右所逼即簾鈞自縊而崩年三十五

徽宗顯恭王皇后開封人德州刺史藻之女也元符二年六月歸于端邸封順國夫人徽宗即位冊為皇

后生欽宗及崇國公主后性恭儉鄭王二妃方亢寵  
后待之均平巨闈妄意迎合誣以闇昧帝命刑部侍  
郎周鼎即秘獄參驗略無一跡獄止后見帝未嘗一  
語輒及帝幡然憐之大觀二年崩年二十五謚曰靜  
和葬裕陵之次紹興中始附徽宗廟室改上今謚云  
鄭皇后開封人也父紳始為直省官以后貴累封太  
師樂平郡王后本欽聖殿押班徽宗為端王每日朝  
慈德宮欽聖命鄭王二押班供侍及即位遂以二人  
賜之后自入宮好觀書章奏能自製帝愛其才崇寧  
初封賢妃遷貴妃有異寵徽宗多賚以詞章天下歌

之王皇后崩政和元年立為皇后將受冊有司創製  
冠服后言國用未足冠珠費多請命工改製妃時舊  
冠又乞罷黃麾仗小駕鹵簿等儀從之恩澤皆弗陳  
請時族子居中在樞府后奏外戚不當預國政必欲  
用之且令充妃職帝為罷居中居中復用后歸寧還  
言居中與父紳相往還人皆言其招權市賄乞禁絕  
許御史奏劾后性端謹善順承帝意劉貴妃薨帝思  
之不已將追冊為后后即奏妃乃其養子乞別議褒  
崇之禮帝大喜欽宗受禪尊為太上皇后遷居寧德  
宮稱寧德太后從上皇幸南京金師退先歸時用事

者言上皇將復辟於鎮江人情危駭或謂后将由端  
門直入禁中內侍輩頗勸欽宗嚴備帝不從出郊迎  
后於是兩宮歡甚洽上皇聞之即罷如洛之議汴京  
破從上皇幸青城北遷留五年崩于五國城年五十  
二紹興七年何蘇等使還始知上皇及后崩高宗大  
慟詔立重成服謚顯肅后親族各遷官有差祔主徽  
宗室以聞哀日為大忌梓宮歸入境承之以擲納暈  
衣其中與徽宗合攢于會稽求佑陵先是后至金營  
訴于粘罕曰妾得罪當行但妾家屬不預朝政乞留  
不遣粘罕許之故紳得歸后既行紳亦以是年薨謚

僖靖家屬流寓江南高宗憐之詔所在尋訪賜官有  
鄭藻者后近屬也紹興中帶御器械用后祔廟恩拜  
隴州防禦使凡四使金歷官至保信軍節度使加太  
尉卒追封榮國公謚端靖

王貴妃與鄭后俱為押班徽宗立封平昌郡君進位  
至貴妃生鄆王楷莘王植陳王機惠淑康淑順德柔  
福冲懿帝姬政和七年九月薨謚曰懿肅

韋賢妃開封人高宗母也初入宮為侍御崇寧末封  
平昌郡君大觀初進婕妤累遷婉容高宗在康邸出  
使進封龍德宮賢妃從上皇北遷建炎改元遙尊為

宣和皇后封其父安道為郡王官親屬三十人由是遣使不絕紹興七年徽宗及鄭皇后崩聞至帝號慟諭輔臣曰宣和皇后春秋高朕思之不遑寧處屈已講和正為此耳翰林學士朱震引唐建中故事請遙尊為皇太后從之已而太常少卿吳表臣請依嘉祐治平故事俟三年喪畢然後舉行乃先降御札播告天下后三代俱追封王帝以后久未歸每輦蹙曰金人若從朕請餘皆非所問也王倫使回言金人許歸后未幾金人遣蕭哲來亦言后将歸狀遂豫作慈壽宮命莫將韓恕為奉迎使十年以金人猶未歸后乃

遙上皇太后冊寶於慈寧殿是後生辰至朔皆遙行  
賀禮洪皓在燕求得后書遣李徽持歸帝大喜曰遣  
使百輩不如一書遂加微官金人遣蕭毅邢具瞻來  
議和帝曰朕有天下而養不及親徽宗無及矣今立  
誓信當明言歸我太后朕不耻和不然朕不憚用兵  
毅等還帝又語之曰太后果還自當謹守誓約如其  
未也雖有誓約徒為虛文命何鑄曹勛報謝召至內  
殿諭之曰朕北望庭闈無淚可揮卿見金主當曰慈  
親之在上國一老人耳在本國則所繫甚重以至誠  
說之庶彼有感動鑄等至金國首以后歸為請金主

曰先朝業已如此豈可輒改勛再三懇請金主始允  
鑄等就館館伴耶律紹文來言金主許從所請洪皓  
聞之先遣人來報鑄等還具言其實遂命參政王次  
翁為奉迎使金人遣其臣高居安完顏宗賢等扈從  
以行十二年四月次燕山自東平泲由清河至楚州  
既渡淮命太后弟安樂郡王韋淵秦魯國大長公主  
吳國長公主迎于道帝親至臨平奉迎普安郡王宰  
執兩省三衙管軍皆從帝初見太后喜極而泣八月  
至臨安入居慈寧宮先是以梓宮未還詔中外輟樂  
至是慶太后壽節始用樂謁家廟親屬遷官幾二千

人太后聰明有智慮初金人許還三梓宮太后恐其  
反覆呼役者畢集然後起攢時方暑金人憚行太后  
慮有他變乃陽稱疾湏秋涼進發已而稱貸于金使  
得黃金三千兩以犒其衆由是途中無間言太后在  
北方聞韓世忠名次臨平呼世忠至簾前慰勞還宮  
帝侍太后或至夜分未去太后曰且休矣聽朝宜早  
恐妨萬幾又嘗謂兩宮給使宜令通用不然則有彼  
我之分而佞人間言易以入也時皇后未立太后屢  
為帝言帝請降手書太后曰我但知家事外庭非所  
當預將行冊命承平典禮悉能記之帝先意承志惟

恐不及或一食稍減輒不勝憂懼常戒宮人曰太后  
年已六十惟優游無事起居適意即壽考康寧事有  
所闕慎毋令太后知第來白朕十九年太后年七十  
正月朔即宮中行慶壽禮親屬各遷官一等太后微  
恙累月不出殿門會牡丹盛開帝入白太后欣然步  
至花所因留宴竟日盡歡翌日以諭宰執后苦目疾  
募得醫皇甫坦治即愈二十九年太后壽登八十復  
行慶禮親屬進官一等庶人年九十宗子女若貢士  
已上父母年八十者悉官封之九月得疾上不視朝  
敕輔臣祈禱天地宗廟社稷赦天下減租稅俄崩于

慈寧宮謚曰顯仁攢于永佑陵之西祔神主太廟徽宗室親屬進秩者十四人授官者三人太后性節儉有司進金唾壺太后易令用塗金宮中賜予不過三數千所得供進財帛多積於庫至是喪葬之費皆仰給焉然好佛老初高宗出使有小妾言見四金甲人執刀劍以衛太后曰我祠四聖謹甚必其陰助既北遷常設祭及歸立祠西湖上

喬貴妃初與高宗母韋妃俱侍鄭皇后結為姊妹約先貴者毋相忘既而貴妃得幸徽宗遂引韋氏二人愈相得二帝北遷貴妃與韋氏俱至是韋妃將還貴

妃以金五十兩贈高居安曰薄物不足為禮願好護  
送姊還江南復舉酒酌韋氏曰姊善重保護歸即為  
皇太后妹無還期終死於朔漠矣遂大慟以別  
劉貴妃其出單微入宮即大幸由才人七遷至貴妃  
生濟陽郡王棫祁王模信王榛政和三年秋薨先是  
妃手植芭蕉於庭曰是物長吾不及見矣已而果然  
左右奔告帝帝初以其微疾不經意趣幸之已薨矣  
始大悲惻特加四字謚曰明達懿文叙其平生絃諸  
樂府又欲踵溫成故事追崇使皇后表請因冊贈為  
后而以明達謚焉時又有安妃劉氏者本酒保家女

初事崇恩宮宮罷出居宦者何訢家內侍楊戩譽其  
美復召入妃以同姓養為女遂有寵為才人進至淑  
妃生建安郡王模嘉國公榘和福帝姬政  
和四年加貴妃朝夕得侍上擅愛顓席嬪御為之稀  
進擢其父劉宗元節度使妃天資警悟解迎意合旨  
雅善塗飾每製一服外間即倣之林靈素以技進目  
為九華玉真安妃肖其像于神霄帝君之左宣和三  
年薨年三十四初謚明節和文旋用明達近比加冊  
贈為皇后葬其園之西北隅帝悼之甚後宮皆往唁  
帝相與啜泣崔妃獨左視無戚容帝悲怒疑其為厭

蠱卜者劉康孫緣妃以進喜妄談休咎捕送開封獄  
醫曹孝忠侍疾無狀閣內侍王堯臣坐盜金珠及出  
金明池游宴事併鞫治獄成同日誅死遂廢崔妃為  
庶人崔生漢王椿及帝姬五人云  
欽宗朱皇后開封祥符人父伯材武康軍節度使欽  
宗在東宮徽宗臨軒備禮冊為皇太子妃欽宗即位  
立為皇后追封伯材為恩平郡王后既北遷不知崩  
聞慶元三年上尊號謚仁懷祔于太廟欽宗室推恩  
后家十五人五年奉安神御于景靈宮兄二人孝孫  
靖康中以節鉞換授右金吾衛上將軍卒贈開府儀

四百八  
同三司孝章一曰孝莊官至永慶軍承宣使卒贈昭  
化軍節度使

高宗憲節邢皇后開封祥符人父煥朝請郎高宗居  
康邸以婦聘之封嘉國夫人王出使夫人留居蕃衍  
宅金人犯京師夫人從三官北遷上皇遣曹勛歸夫  
人脫所御金環使內侍持付勛曰幸為吾白太王願  
如此環得早相見也王憐之及即位遙冊為皇后官  
后親屬二十五人紹興九年后崩于五國城年三十  
四金人秘之高宗虛中宮以待者十六年顯仁太后  
回鑾始得崩聞上為輟朝行釋服之祭謚懿節祔主

于別廟紹興十二年八月后梓宮至攢于聖獻太后梓宮之西北帝思后殊慘不樂皇后吳氏知帝意乃請為其姪珣瑤婚邢氏二女以慰帝心淳熙末改謚憲節祔高宗廟

憲聖慈烈吳皇后開封人父近以后貴累官武翼郎贈太師追封吳王謚宣靖近嘗夢至一亭扁曰侍康傍植芍藥獨放一花殊妍麗可愛花下白羊一近寤而異之后以乙未歲生方產時紅光徹戶外年十四高宗為康王被選入宮人謂侍康之徵王即帝位后常以戎服侍左右后頗知書從幸四明衛士謀為變

入問帝所在后給之以免未幾帝航海有魚躍入御舟后曰此周人白魚之祥也帝大悅封和義郡夫人還越進封才人后益博習書史又善翰墨由是寵遇日至與張氏並為婉儀尋進貴妃顯仁太后回鑾亦愛后憲節皇后崩聞至秦檜等累表請立中宮太后亦為言紹興十三年詔立貴妃為皇后帝御文德殿授册后即穆清殿廷受之追王三代親屬由后官者三十五人顯仁太后性嚴肅后身承起居順適其意嘗繪古列女圖置坐右為鑒又取詩序之義扁其堂曰賢志初伯琮以宗子召入官命張氏育之后時為

才人亦請得育一子於是得伯玖更名璩中外議頗籍籍張氏卒併育于后后視之無間伯琮性恭儉喜讀書帝與后皆愛之封普安郡王后嘗語帝曰普安其天日之表也帝意決立為皇子封建王出璩居紹興高宗內禪手詔后稱太上皇后遷居德壽宮孝宗即位上尊號曰壽聖太上皇后月朔朝上皇畢入見后如宮中儀乾道七年加號壽聖明慈淳熙二年以上皇行慶壽禮復加壽聖齊明廣慈之號十年以后年七十親屬推恩有差十二年加尊號曰備德上皇崩遺詔改稱皇太后帝欲迎還大内太后以上皇几

廷在德壽宮不忍舍去因名所御殿曰慈福居焉光宗即位更號壽聖皇太后以壽皇故不稱太皇太后也帝嘗言及用人后曰宜崇尚舊臣紹熙四年后壽八十帝乃覲后奉冊禮加尊號曰隆慈備福五年正月帝率群臣行慶壽禮嘉王侍側后勉以讀書辨邪正立綱常為先夏孝宗崩始正太皇太后之號時光宗疾未平不能執喪宰臣請垂簾主喪事后不可已而宰執請如唐肅宗故事群臣發喪太極殿成服禁中許之后代行祭奠禮尋用樞密趙汝愚請於梓宮前垂簾宣光宗手詔立皇子嘉王為皇帝翌日冊夫

人韓氏為皇后撤簾慶元元年加號光祐遷居重華  
宮汝愚後以謫死中書舍人汪義端目汝愚為李林  
甫欲併逐其黨太后聞而非之三年十月后寢疾詔  
禱天地宗廟社稷大赦天下踰月而崩年八十三遺  
誥太上皇帝疾未痊瘡宜於宮中承重皇帝服齊衰  
五月以日易月詔服朞年喪謚曰憲聖慈烈攢祔于  
永思陵

潘賢妃開封人元懿太子母也父永壽直翰林醫局  
官高宗居康邸時納之邢后北遷妃未有位號帝即  
位將立為后呂好問諫止之立為賢妃太子薨從隆

字三百八十八  
正刊

祐太后于江西踰年還紹興十八年薨求壽贈太子

少師

張賢妃開封人建炎初為才人有寵進婕妤帝欲擇  
宗室子養禁中輔臣問帝以宮中可付託者誰耶帝  
曰已得之矣意在婕妤已而伯琮入宮年尚幼婕妤  
與潘賢妃吳才人方環坐以觀其所向時賢妃新失  
皇子意忽忽不樂婕妤手招之遂向婕妤帝因命婕  
妤母之是為孝宗尋遷婉儀十二年卒上為輟朝二  
日贈賢妃弟萃閣門宣贊舍人妃薨遷秩二階  
劉貴妃臨安人入官為紅霞帔遷才人累遷婕妤婉

容紹興二十四年進賢妃頗恃寵驕侈嘗因盛夏以水晶飾脚踏帝見之命取為枕妃懼撤去之淳熙十四年薨父懋累官昭慶軍節度使金人南侵獻錢二萬緡以助軍興費懋子允升紹興末為和州防禦使知閤門事奉使還遷荊州防禦使福州觀察使

劉婉儀初入宮封宜春郡夫人尋進才人與劉婉容俱被寵進婉儀婉儀頗恃恩招權嘗遣人諷廣州蕃商獻明珠香藥許以官爵舶官林孝澤言于朝詔止其獻金人將叛盟劉錡主戰幸醫王繼先從中沮之因謀誅錡帝不憚一日在婉儀位有憂色婉儀陰訪

三百九十二个  
宋史文傳卷二  
二一  
芳  
富  
刊  
得其言以寬譬帝意帝恠與繼先言合詰之婉儀急  
具以實對帝大怒託以他過廢之兄伉累官和州防  
禦使知閤門事婉儀既廢乃與祠罷歸

張貴妃開封祥符人初入官封永嘉郡夫人乾道六  
年進婉容淳熙七年封太上皇淑妃十六年進貴妃  
紹熙元年薨美人馮氏才人韓氏吳氏李氏王氏俱  
被寵幸後皆廢吳氏中宮近屬也紹興三十年復故  
封李氏王氏俱明豔淳熙末上皇愛之及崩憲聖后  
見二才人每感憤孝宗即追告命許自便蓋非常制

云

孝宗成穆郭皇后開封祥符人奉直大夫直鄉之女  
孫其六世祖為章穆皇后外家孝宗為普安郡王時  
納郭氏封咸寧郡夫人生光宗及莊文太子愔魏惠  
憲王愷邵悼肅王恪紹興二十六年薨年三十一追  
封淑國夫人三十一年用明堂恩贈福國夫人既建  
太子追封皇太子妃及受禪追冊為皇后謚恭懷尋  
改安穆及營阜陵又改成穆祔孝宗廟父瑊累官昭  
慶軍承宣使追封榮王孝宗待郭氏恩禮彌厚然不  
假外戚以官爵后弟師禹師元官不過承宣使師元  
不及建節而卒將內禪師禹始除節度使光宗朝官

四百令六  
至太保封永寧郡王

成恭夏皇后袁州宜春人曾祖令吉為吉水簿夏氏  
初入宮為憲聖太后閣中侍御普安郡王夫人郭氏  
薨太后以夏氏賜王封齊安郡夫人即位進賢妃踰  
年奉上皇命立為皇后乾道二年謁家廟親屬推恩  
十一人三年崩謚安恭寧宗時改謚成恭初后之生  
也有異光穿室父協竒之及長以姿納宮中久之父  
居益困及歸客表之僧舍號夏翁翁亡后始貴訪得  
其弟執中補承信郎閤門祇候未幾遷右武郎閤門  
宣贊舍人累遷奉國軍節度使提舉萬壽觀寧宗即

位加少保踰年卒于家初執中與其微時妻至京宮人諷使出之擇配貴族欲以媚后執中弗為動他日  
后親為言執中誦宋弘語以對后不能奪既貴始從  
師學作大字頗工復善騎射高宗行慶壽禮近戚爭  
獻珍環執中獨大書一人有慶萬壽無疆以獻高宗  
喜錫賚甚渥嘗為館伴副使連射皆命中金人駭服  
孝宗聞其才將召用之謝曰他日無累陛下保全足  
矣人以此益賢之

成肅謝皇后丹陽人幼孤鞠於翟氏因冒姓焉及長  
被選入宮憲聖太后以賜普安郡王封咸安郡夫人

字四百十三不  
王即位進婉容踰年進貴妃成恭皇后崩中宮虛位  
淳熙三年妃侍帝過德壽宮上皇諭以立后意尋遣  
張去為傳旨立貴妃為皇后復姓謝氏親屬推恩者  
十人光宗受禪上尊號壽成皇后孝宗崩尊為皇太  
后慶元初加號惠慈嘉泰二年加慈佑太皇太后三  
年崩謚成肅攢衲于永阜陵后性儉慈戒膳羊每食  
必先以進御服澣濯衣有數年不易者第淵以后貴  
授武翼郎后嘗戒之曰主上化行恭儉吾亦躬服澣  
濯爾宜崇謙抑遠驕侈後歷閣門宣贊舍人帶御器  
械光宗朝遷果州團練使寧宗立轉萊州防禦使擢

知閣門事仍幹辦皇城司三遷至保信軍節度使尋  
加太尉開府儀同三司成肅皇后崩遺詔賜淵錢十  
萬緡金二千兩田十頃僦緡日十千後累陞三少封  
和國公嘉定四年薨贈太保

蔡貴妃初入宮為紅霞帔封和義郡夫人進婉容淳  
熙十年冬拜貴妃十二年秋薨父滂宜春觀察使

李賢妃初入宮為典字轉通義郡夫人進婕妤淳熙  
十年卒贈賢妃時李燾在經筵嘗諫省後宮費帝曰  
朕老矣安有是近葬李妃用三萬緡耳帝雖在位久  
後宮寵幸無著聞者

光宗慈懿李皇后安陽人慶遠軍節度使贈太尉道  
之中女初后生有黑鳳集道營前石上道心異遂字  
后曰鳳娘道帥湖北聞道士皇甫坦善相人乃出諸  
女拜坦坦見后驚不敢受拜曰此女當母天下坦言  
於高宗遂聘為恭王妃封榮國夫人進定國夫人乾  
道四年生嘉王七年立為皇太子妃性妬悍嘗訴太  
子左右於高孝二宮高宗不懌謂吳后曰是婦將種  
吾為皇甫坦所誤孝宗亦屢訓后宜以皇太后為法  
不然行當廢汝后疑其說出於太后及太子即位冊  
為皇后光宗欲誅宦者近習皆懼遂謀離間三宮會

帝得心疾孝宗購得良藥欲因帝至宮授之宦者遂  
訴於后曰太上合藥一大丸俟宮車過即投藥萬一  
有不虞其奈宗社何后覘藥實有心銜之頃之內宴  
后請立嘉王為太子孝宗不許后曰妾六禮所聘嘉  
王妾親生也何為不可孝宗大怒后退持嘉王泣訴  
于帝謂壽皇有廢立意帝惑之遂不朝太上帝嘗宮  
中浣手睹宮人手白悅之他日后遣人送食合于帝  
啓之則宮人兩手也又黃貴妃有寵因帝親郊宿齊  
宮后殺之以暴卒聞是夕風雨大作黃壇燭盡滅不  
能成禮帝疾由是益增劇不視朝政事多決於后矣

后益驕奢封三代為王家廟逾制衛兵多於太廟后歸謁家廟推恩親屬二十六人使臣一百七十二人下至李氏門客亦奏補官中興以來未有也是時帝久不朝太上中外疑駭紹興四年九月重明節宰執侍從臺諫連章請帝過宮給事中謝深甫言父子至親天理昭然太上之愛陛下亦猶陛下之愛嘉王太上春秋高千秋萬歲後陛下何以見天下帝感悟趣命駕朝重華宮是日百官班列俟帝出至御屏后挽留帝入曰天寒官家且飲酒百僚侍衛相顧莫敢言中書舍人陳傅良引帝裾請毋入因至屏後后叱曰

此何地爾秀才欲斫頭邪傳良下殿慟哭后復使人問曰此何理也傳良曰子諫父不聽則號泣而隨之后益怒遂傳旨罷還宮其後孝宗崩帝不能親執喪宰相趙汝愚謀內禪立寧宗尊后曰太上皇后上尊號曰壽仁慶元六年崩年五十六謚慈懿

黃貴妃淳熙末在德壽宮封和義郡夫人光宗為皇太子傍無侍姬上皇以夫人賜之遂專寵即位拜貴妃紹熙二年冬十一月為皇后李氏所殺帝聞而成疾又有張貴妃亦舊侍東宮次婕妤符氏後出嫁於民間

寧宗恭淑韓皇后相州人其六世祖為忠獻王琦初  
后與姊俱被選入宮后能順適兩宮意遂歸平陽郡  
邸封新安郡夫人進崇國夫人王受禪冊夫人為皇  
后后父同卿由知泰州陞揚州觀察使母莊氏封安  
國夫人慶元六年崩謚恭淑同卿累遷慶遠軍節度  
使加太尉慶元五年卒贈太師謚恭靖同卿季父佐  
胄自以有定策功聲勢熏灼同卿每懼滿盈不敢干  
政時天下皆知佐胄為后族不知同卿乃后父也同  
卿沒一年而后崩佐胄竟敗人始服其善遠權勢云  
同卿子煥后兄也官至承宣使

恭聖仁烈楊皇后少以姿容選入宮忘其姓氏或云  
會稽人慶元元年三月封平樂郡夫人三年四月進  
封婕妤有楊次山者亦會稽人后自謂其兄也遂姓  
楊氏五年進婉儀六年進貴妃恭淑皇后崩中宮未  
有所屬貴妃與曹美人俱有寵韓侂胄見妃任權術  
而曹美人性柔順勸帝立曹而貴妃頗涉書史知古  
今性復機警帝竟立之次山客王慶龍知其謀密以  
告后后深銜之與次山欲因事誅侂胄會侂胄議用  
兵中原俾皇子曦入奏侂胄再啓兵端將不利於社  
稷帝不荅后從傍贊之甚力亦不荅恐事泄俾次山

擇廷臣可任者與共圖之禮部侍郎史彌遠素與侂  
冑有隙遂欣然奉命參知政事錢象祖嘗諫用兵貶  
信州彌遠乃先告之禮部尚書衛涇著作郎王居安  
前右司郎官張鑑皆預其謀開熙三年十一月三日  
侂冑方早朝彌遠密遣中軍統制夏震伏兵六部橋  
側率健卒擁侂冑至玉津園槌殺之復命彌遠象祖  
等俱赴延和殿以殛侂冑聞帝不之信越三日帝猶  
謂其未死蓋是謀悉出中官及次山等帝初不知也  
后既誅侂冑彌遠日益貴用事嘉定十四年帝以國  
嗣未定養宗室子貴和立為皇子賜名竑彌遠為丞

相既信任於后遂專國政竑漸不能平初竑好琴彌  
遠買羨人善琴者納之而私厚羨人家令伺皇子動  
靜竑嬖之一日竑指輿地圖示羨人曰此瓊崖州也  
他日必置史彌遠於此地羨人以告彌遠竑又書字  
於几曰彌遠當決配八千里竑左右皆彌遠腹心走  
白彌遠彌遠大懼陰蓄異志欲立他宗室子昀為皇  
子遂陰與昀通十七年閏八月丁酉帝大漸彌遠夜  
召昀入宮后尚未知也彌遠遣后兄子谷及石以廢  
立事白后后不可曰皇子先帝所立豈敢擅變是夜  
凡七徃反后終不聽谷等乃拜泣曰內外軍民皆已

歸心苟不立之禍變必生則楊氏無噍類矣后默然良久曰其人安在彌遠等召昀入后拊其背曰汝今為吾子矣遂矯詔廢竑為濟王立昀為皇子即帝位尊皇后曰皇太后同聽政寶慶二年十一月戊寅加尊號壽明紹定元年正月丙子復加慈睿四年正月后壽七十帝率百官朝慈明殿加尊號壽明仁福慈睿皇太后十二月辛巳后不豫詔禱祠天地宗廟社稷宮觀赦天下五年十二月壬午崩于慈明殿壽七十有一謚恭聖仁烈次山官至少保封永陽郡王次山二子谷封新安郡王石永寧郡王自有傳姪孫鎮

尚理宗女周漢公主官至左領軍衛將軍駙馬都統  
宗族鳳孫等皆任通顯云

理宗謝皇后諱道清天台人父渠伯祖深甫后生而  
顰黑瞖一目渠伯早卒家產益破壞后嘗躬親汲飪  
初深甫爲相有援立楊太后功太后德之理宗即位  
議擇中宮太后命選謝氏諸女后獨在室兄弟欲納  
入宮諸父擗伯不可曰即奉詔納女當厚奉資裝異  
時不過一老宮婢事奚益會元夕縣有鵲來巢燈山  
衆以爲后妃之祥擗伯不能止乃供送后就道后旋  
病疹良已膚琬瑩白如玉醫又藥去目醫時賈涉女

有殊色同在選中及入宮理宗意欲立賈太后曰謝女端重有福宜正中宮左右亦皆竊語曰不立真皇后乃立假皇后邪帝不能奪遂定立后初封通議郡夫人寶慶三年九月進貴妃十二月冊為皇后后既立賈貴妃專寵貴妃薨閻貴妃又以色進后處之裕如畧不介懷太后深賢之而帝禮遇益加焉開慶初大元兵渡江理宗議遷都平江慶元后諫不可恐搖動民心乃止理宗崩度宗立咸淳三年尊為皇太后號壽和聖福進封三代父渠伯魏王祖深甫曾祖景之皆魯王宗族男女各進秩賜封賞賚有差度宗崩

瀛國公即位尊為太皇太后太后年老且疾大臣屢請垂簾同聽政彊之乃許加封五代太后以兵興費繁痛自裁節汰慈元殿提舉已下官省汎索錢緡月萬平章賈似道兵潰陳宜中上疏請正其罪太后曰似道勤勞三朝豈宜以一旦罪而失遇大臣禮先削其官後乃寘法貶死京朝官聞難徃徃避匿遁去太后命揭榜朝堂曰我國家三百年待士大夫不薄吾與嗣君遭家多難爾小大臣不能出一策以救時艱內則畔官離次外則委印棄城避難偷生尚何人為亦何以見先帝於地下乎天命未改國法尚存凡在

官守者尚書省即與轉一資負國逃者御史覺察以聞德祐元年六月朔日食既太后削聖福以應天變丞相王爚老病陳宜中留夢炎庸懦無所長日坐朝堂相爭戾而張世傑兵敗於焦山宜中棄官去太后累召不至遺書宜中母使勉之十月始還朝太后又親為書召夏貴等兵曰吾母子不足念獨不報先帝德乎貴等亦罕有至者是月大元兵破常州太后遣陸秀夫等請和不從宜中即率公卿請遷都太后不許宜中痛哭固請不得已從之明日當啓行而宜中倉卒失奏於是宮車已駕日且暮而宜中不至太后

怒而止明年正月更命宜中使軍中約用臣禮宜中  
難之太后涕泣曰苟存社稷臣非所較也未幾大元  
兵薄臯亭山宜中宵遁文武百官亦潛相引去二月  
辛丑大軍駐錢塘宋亡瀛國公與全后入朝太后以  
疾留杭是年八月至京師降封壽春郡夫人越七年  
終年七十四無子兄奕宋時封郡王姪堂兩浙鎮撫  
大使尚榮郡公主暨墓並節度使端平初頗干國政  
云

度宗全皇后會稽人理宗母慈憲夫人姪孫女也略  
涉書史幼從父昭孫知岳州開慶初秩滿歸道潭州

時大元兵自羅鬼入破全衡求桂圍潭州人有見神人衛城者已而潭獨不下逾年事平至臨安會忠王議納妃初丁大全請選知臨安府顧嵩女已致聘矣大全敗嵩亦罷去臺臣論嵩大全黨宜別選名族以配太子臣僚遂言全氏侍其父昭孫往返江湖備嘗艱險其處貴富必能盡警戒相成之道理宗以母慈憲故乃詔后入宮問曰爾父昭孫昔在寶祐間沒於王事每念之令人可哀后對曰妾父可念淮湖之民尤可念也帝深異之語大臣曰全氏女言辭甚令宜配冢嫡以承祭祀景定二年十一月詔封永嘉郡夫

人十二月冊為皇太子妃弟永堅等補承信郎直秘閣度宗立咸淳三年正月冊為皇后追贈三代賜家廟第宅弟清夫庭輝等一十五人各轉一官五年三月后歸寧推恩姻族五十六人進一秩咸平郡夫人全氏三十二人各特封有差后生子不育次生瀛國公十年度宗崩瀛國公立冊為皇太后宋亡從瀛國公入朝于燕京後為尼正智寺而終

楊淑妃初選入宮為美人咸淳二年進封淑妃推恩親屬幼節等三十四人進秩有差生建國公昞宋亡昞走温州又走福州衆推為主冊妃為太后封弟昺

衛王昺脩容俞氏所生也至元十四年大軍圍昱於海上明年四月昱卒昺代立十六年春二月昺投海死妃聞之大慟曰我艱關忍死者正為趙氏祭祀尚  
有可望爾今天命至此夫復何言遂赴海死其將張世傑葬之海濱

列傳卷第二

皇太子昺... 趙氏... 祭祀... 尚... 有可望爾... 夫復何言... 遂赴海死... 其將張世傑葬之海濱

列傳卷第三

宋史二百四十四

開禧三司上柱國錄軍國事兼丞相兼國史領經筵事都總裁脫脫等奉

勅修

宗室一

魏王廷美

燕王德昭

秦王德芳 秀王子備附

昔周之初興大封建宗室及其東遷晉鄭有同獎之功然其衰也榦弱而枝強後世於是有矯其失者而封建不復古矣宋承唐制宗王襁褓即裂土而爵之然名存實亡無補於事降至疏屬宗正有籍玉牒有

名宗學有教郊祀明堂遇國慶典皆有祿秩所寓州縣月有廩餼至於宗女適人亦有恩數然國祚既長世代浸遠恒產豐約去士庶之家無甚相遠者靖康之亂諸王駢首以弊於金人之虐論者咎其無封建之實故不獲維城之助焉雖然東都之仁宗南渡之高寧元良虛位立繼小宗大策一定卒無動搖磐石之固亦可知矣且宋於宗室稍有過差君臣之間不吝於改尤不憚於言涪陵武功真宗即位尋議追復改葬封其子孫濮邸尊稱言者惟務格非不少避忌宋末濟邸國事將亡諫疏不息必褒卹而後止是蓋

歷代之所難得者歟表而出之作宗室傳

魏悼王廷美字文化本名光美太平興國初改今名  
太祖兄弟五人兄光濟早亡宋興追封邕王改曹王  
弟光義即太宗次廷美次光贊幼亡追封夔王改岐  
王建隆元年授廷美嘉州防禦使二年遷興元尹山  
南西道節度使乾德二年加同中書門下平章事開  
寶六年加檢校太保侍中京兆尹永興軍節度使太  
宗即位加中書令開封尹封齊王又加檢校太師從  
征太原進封秦王七年三月或告秦王廷美驕恣將  
有陰謀竊發上不忍暴其事遂罷廷美開封尹授西

京留守賜襲衣通犀帶錢千萬緡絹綵各萬匹銀萬兩西京甲第一區詔樞密使曹彬餞廷美於瓊林苑以太常博士王適判河南府事開封府判官閻矩判留守事以如京使柴禹錫為宣徽北院使兼樞密副使楊守一為東上閣門使充樞密都承旨賞其告廷美陰謀功也左衛將軍樞密承旨陳從龍為左衛將軍皇城使劉知信為右衛將軍弓箭庫使惠延真為商州長史禁軍列校皇甫繼明責為汝州馬步軍都指揮使定人王榮為濮州教練使皆坐交通廷美及受其燕犒也榮未行或又告榮嘗與廷美親吏狂言

我不久當得節帥坐削籍流海島會趙普再相廉得  
盧多遜與廷美交通事上聞上怒責授多遜兵部尚  
書下御史獄捕繫中書守堂官趙白秦府孔目官閻  
密小吏王繼勳樊德明趙懷祿閻懷忠等命翰林學  
士承旨李昉學士扈蒙衛尉卿崔仁冀膳部郎中兼  
御史知雜滕中正雜治之多遜自言累遣趙白以中  
書機事密告廷美去年九月中又令趙白言於廷美  
云願宮車晏駕盡力事太王廷美遣樊德明報多遜  
云承旨言正會我意我亦願宮車早晏駕私遣多遜  
弓箭等多遜受之閻密初給事廷美上即位補殿直

仍隸秦王府恣橫不法言多指斥王繼勳尤為廷美親信嘗使求訪聲妓怙勢取貨贓污狼藉樊德明素與趙白遊處多遜因之以結廷美廷美又遣趙懷祿私召同母弟軍器庫副使趙廷俊與語閻懷忠嘗為廷美詣淮海王錢俶求犀玉帶金酒器懷忠受俶私遺白金百兩金器絹扇等廷美又嘗遣懷忠齎銀盃錦綵羊酒詣其妻父御前忠佐馬軍都軍頭開封潘潏管燕軍校至是皆伏罪詔文武常參官集議朝堂太子太師王溥等七十四人奏多遜及廷美顧望呪詛大逆不道宜行誅滅以正刑章趙白等處斬詔削

奪多遜官爵并家屬流崖州廷美勒歸私第趙白閻  
密王繼勳樊德明趙懷祿閻懷忠皆斬於都門外籍  
其家財詔秦王廷美男女等宜正名稱貴州防禦使  
德恭等仍為皇姪皇姪女適韓氏去雲陽公主之號  
右監門將軍韓崇業降為右千牛衛率府率仍去駙  
馬都尉之號並發遣西京就廷美居止五月貶西京  
留守判官閻矩為涪州司戶叅軍前開封推官孫嶼  
為融州司戶叅軍皆秦王廷美官屬坐輔導無狀也  
趙普以廷美謫居西洛非便復教知開封府李符上  
言廷美不悔過怨望乞徙遠郡以防他變詔降廷美

為涪陵縣公房州安置妻楚國夫人張氏削國封命  
崇儀使閻彥進知房州監察御史袁廓通判州事各  
賜白金三百兩八年正月涪陵縣公廷美母陳國夫  
人耿氏卒雍熙元年廷美至房州因憂悸成疾而卒  
年三十八上聞之嗚咽流涕謂宰相曰廷美自少剛  
愎長益凶惡朕以同氣至親不忍寘之於法俾居房  
陵冀其思過方欲推恩復舊遽茲殞逝痛傷奈何因  
悲泣感動左右遂下詔追封廷美為涪王謚曰悼為  
發哀成服其後太宗從容謂宰相曰廷美母陳國夫  
人耿氏朕乳母也後出嫁趙氏生廷俊朕以廷美故

令廷俊屬韃左右而廷俊泄禁中事於廷美邇者鑿西池水心殿成橋梁未備朕將泛舟往焉廷美與左右謀欲以此時竊發不果即詐稱疾於邸俟朕臨省因而為變有告其事者若命有司窮究則廷美罪不容誅朕不欲暴揚其醜及盧多遜交通事發止令居守西洛而廷美不悔過益怨望出不遜語始命遷房陵以全宥之至于廷俊亦不加深罪但從貶宥朕於廷美蓋無負矣言未訖為之惻然李昉對曰涪陵悖逆天下共聞西池禁中事若非陛下委曲宣示臣等何由知之初昭憲太后不豫命太祖傳位太宗因顧

謂趙普曰爾同記吾言不可違也命普於榻前為約誓書普於紙尾書云臣普書藏之金匱命謹密宮人掌之或謂昭憲及太祖本意蓋欲太宗傳之廷美而廷美復傳之德昭故太宗既立即令廷美尹開封德昭實稱皇子德昭不得其死德芳相繼天絕廷美始不自安已而柴禹錫等告廷美陰謀上召問普普對曰臣願備樞軸以察姦變退復密奏臣忝舊臣為權倖所沮因言昭憲太后顧命及先朝自愬之事上於宮中訪得普前所上章并發金匱得誓書遂大感悟召普謂曰人誰無過朕不待五十已盡知四十九年

非矣辛亥以普為司徒兼侍中他日太宗嘗以傳國之意訪之趙普普曰太祖已誤陛下豈容再誤邪於是廷美遂得罪凡廷美所以遂得罪普之為也至道初命司門員外郎孫贇為皇姪諸孫教授廷美諸子之在京者肄業焉真宗即位追復皇叔涪王廷美西京留守檢校太師兼中書令河南尹秦王張氏楚國夫人咸平二年閏三月詔擇汝鄧地改葬汝州梁縣之新豐鄉仁宗即位贈太師尚書令徽宗即位改封魏王子十人德恭德隆德彞德雍德鈞德欽德潤德文德愿德存故事皇族封王者物故則本宮之長封

國公其後以次受封於是德鈞子承簡屬最長襲封徐國公官至保康軍留後贈彰化軍節度使安定郡王謚和懿承簡既薨德雍子承亮襲封昌國公神宗即位拜感德軍節度使改封榮熙寧二年詔宣祖太祖太宗之子皆擇其後一人為宗世世封公以奉其祀不以服屬盡故殺其恩禮三年太常禮院言本朝近制諸王之後皆用本官最長一人封公繼襲去年詔祖宗之子皆擇其後一人為宗世世封公即與舊制有異按禮文諸王公侯伯子男皆子孫承嫡者傳襲若無嫡子及有罪疾立嫡孫無嫡孫以次立嫡子

同母弟無母弟立庶子無庶子立嫡孫同母弟無同  
母弟立庶孫曾孫以下準此合依禮令傳嫡承襲詔  
可乃以承亮為秦國公奉秦王廷羨祀明年薨贈樂  
平郡王謚曰恭靜子克愉嗣克愉卒子叔牙嗣元符  
三年改今封德恭字復禮太平興國四年以皇子出  
閣拜貴州防禦使廷羨徙房陵諸子悉從行因免官  
廷羨卒復以德恭為峯州刺史弟德隆為灤州刺史  
韓崇業為靜難行軍司馬雍熙元年十二月詔以德  
恭為左武衛大將軍封安定郡侯判濟州德隆為右  
武衛大將軍封長寧郡侯判沂州諸弟皆隨赴治所

令高品衛紹欽送至州常奉外歲給錢三百萬命起居舍人韓檢右補闕劉蒙叟分任二州通判上臨遣之曰德恭等始歷郡善裨贊之苟有關失而不力正止罪爾等端拱元年進封德恭安定郡公淳化四年改左驍衛大將軍至道二年加左神武大將軍真宗嗣位就轉左武衛大將軍咸平二年召赴闕改封樂平郡公判魏州乞奉朝請從之遷勝州團練使景德初改衛州防禦使三年被疾子承慶剗股肉食之五月卒年四十五上臨哭之慟廢朝三日贈保信軍節度使追封申國公天禧二年從承慶請加贈護國軍

節度兼侍中明道二年追封高密郡王謚慈惠子承  
慶承壽承慶官至和州團練使卒贈武信軍節度使  
循國公子六人克繼善楷書尤工篆隸宗正薦之仁  
宗親臨試及令臨蔡邕古文法寫論語詩書復詔與  
士朝分隸石經帝曰李陽冰唐室之秀今克繼朕之  
陽冰也訓子弟力學一門登儒科者十有二人嘗進  
所集廣韻字源帝稱善藏之秘閣元祐五年以定武  
軍節度觀察留後卒贈開府儀同三司建國公謚章  
靖承壽終南作坊使贈德州刺史武當侯子四人克  
己曉音律嘗作雅樂圖樂曲以獻侍宴大清樓進所

學虞世南書賜噐加等終右千牛衛大將軍贈深州防禦使饒陽侯子叔韶字君和慶曆六年與諸宗子帝前臨真宗御書選第一皇祐初進所為文召試學士院中等賜進士及第自太子右監門率府副率遷右領軍衛將軍入謝命坐賜茶仁宗曰宗子好學者頗多獨爾以文章第進士前此蓋未有也朕欲天下知屬籍有賢者宜勿忘所學叔韶頓首謝既退又出九經賜之遷右屯衛大將軍至和中上書求試煩劇加領賀州刺史終和州防禦使贈鎮東節度觀察留後會稽郡公克脩字子莊仁宗為皇子時得出入禁

中侍學故仁宗待遇殊厚帝嘗御大清樓召宗室試書以克脩為善終右神武軍大將軍成州團練使贈同州觀察使馮翊侯子叔充父早世異母弟叔瑁甚幼叔充拊視誨教成人先是繼母無叙封法叔充請於朝詔從之遂為定制藏書至萬卷子九人登科者三卒官唐州防禦使贈崇信軍節度使尹國公謚孝齊遺表祈任子有司格不下子撫之抗章自列乞如外官法朝廷從其請宗室正任有遺恩自此始德隆字日新雍熙三年卒官沂州守年二十三贈寧遠軍節度追封臨沂郡公天禧二年從其子承訓之請加

贈崇信軍節度同平章事承訓官至順州刺史卒贈  
深州團練使德彞字可久太祖召鞠於宮中德隆卒  
授右千牛衛大將軍封長寧郡侯代兄德隆判沂州  
時年十九飛蝗入境吏民請坎瘞火焚之德彞曰上  
天降災守臣之罪也乃責躬引咎齋戒致禱既而蝗  
自殪儒生乙恕者郊居肄業一日有尸橫舍下所司  
捕恕抵獄將寘於法德彞疑其寃命他司按之無異  
因令緩刑以俟未幾果獲殺人者恕遂得釋進封郡  
公淳化四年為右監門衛大將軍遷左武衛大將軍  
改封廣平部民詣闕乞留有詔嘉獎真宗初召還咸

平二年命判滁州與德恭並留不遣三年授徐州刺史累遷保信軍節度觀察留後大中祥符八年卒年四十九上臨奠廢朝三日贈昭信軍節度使追封信都郡王謚安簡明道二年改封潁川子承謨前卒承矩終莊宅使贈博州刺史承勗至供奉官贈六宅副使承範承拱並西京作坊使承衍內殿崇班承錫供奉官德雍字仲達淳化初授右驍衛將軍歷右羽林龍武二將軍累遷蔡州觀察使咸寧郡公終天平軍節度觀察留後贈宣德軍節度同中書門下平章事謚康簡明道中追封廣陵郡王子承睦承亮承睦終

左領軍衛大將軍彭州團練虔州觀察使南康侯承亮封秦國公事見上德鈞字子正性和雅善書翰好為篇什淳化初拜右武衛將軍四遷至右衛將軍景德二年加右監門衛大將軍四年卒贈河州觀察使追封安鄉侯時妻亦卒男女十四人皆幼上甚嗟悼之子承震早卒承緒供奉官承偉承雅承裔承鑑承則並西京作坊使承裕禮賓副使承翊內殿崇班承簡襲徐國公承幹終懷州防禦使贈保靜軍節度使蕭國公子克敦嗜經術以宗正薦召試中選賜錢三十萬元豐間集父承幹遺文以進神宗嘉之詔承幹

父子以藝文儒學名于宗藩宜有褒勸於是追封承  
幹為東平王而賜克敦敕書獎諭以宣州觀察使卒  
贈開府儀同三司和國公德欽字丕從淳化元年授  
右屯衛將軍四遷右羽林將軍景德元年六月卒年  
三十一贈雲州觀察使追封雲中侯子承遵西京作  
坊使德潤字溫玉頗好學善為詩淳化元年始授右  
領軍衛將軍四遷右羽林將軍咸平六年二月卒年  
三十九贈應州觀察使追封金城侯德文字子砥淳  
化初授右監門衛將軍累遷滑州觀察使馮翊郡公  
少好學凡經史百家手自抄撮工為辭章真宗以其

刻勵如諸生嘗因進見戲呼之曰五秀才宮中由是  
悉稱之德文本廷美第八子其兄三人早卒故德文  
於次為第五也帝封泰山祀汾陰幸亳德文必奏賦  
頌帝每賜詩輒令屬和數言願得名士為師友特命  
翰林學士楊億與之游億卒為詩十章悼之天聖中  
遷橫海軍節度觀察留後拜昭武軍節度使易感德  
武勝二軍加同中書門下平章事仁宗嘗稱為五相  
公而不名慶曆四年宗室王者四人以德文屬祖且  
賢方漢東平王蒼進封東平郡王加兼侍中德文雖  
老嗜學不倦晚被足疾不能朝六年薨年七十二初

得疾仁宗臨視親調藥飲之及訃聞復臨哭贈太尉  
中書令申王謚恭裕子六人承顯以王後襲封康國  
公官至昭化軍節度使薨年七十四贈太尉樂平郡  
王德愿字公謹淳化元年授右千牛衛大將軍三進  
秩為左武衛大將軍咸平二年閏三月卒年二十四  
贈涼州觀察使追封姑臧侯德存字安世九歲授右  
千牛衛將軍歷監門至驍衛從祠泰山領樊州刺史  
祀汾陰以恩遷左羽林將軍大中祥符四年六月卒  
年三十贈洮州觀察使追封洮陽侯子承衍禮賓副  
使

太祖四子長滕王德秀次燕懿王德昭次舒王德林次秦康惠王德芳德秀德林皆早亡徽宗時追賜名及王封

燕懿王德昭字日新母賀皇后乾德二年出閣故事皇子出閣即封王太祖以德昭冲年欲其由漸而進授貴州防禦使開寶六年授興元尹山南西道節度使檢校太傅同中書門下平章事終太祖之世竟不封以王爵太宗太平興國元年改京兆尹移鎮永興兼侍中始封武功郡王詔與齊王廷美自今朝會宜班宰相之上三年二月娶太子太傅王溥女封韓國

夫人是冬郊祀加檢校太尉四年從征幽州軍中嘗  
夜驚不知上所在有謀立德昭者上聞不悅及歸以  
北征不利久不行太原之賞德昭以為言上大怒曰  
待汝自為之賞未晚也德昭退而自刎上聞驚悔往  
抱其尸大哭曰癡兒何至此邪贈中書令追封魏王  
賜謚後改吳王又改越王德昭喜愠不形於色真宗  
即位贈太傅乾興初加贈太師子五人惟正惟吉惟  
固惟忠惟和慶曆四年詔封十王之後以惟忠子從  
藹襲封潁國公而惟吉子守異以真王後最長與從  
藹同封守異官至和州防禦使贈武成軍節度使楚

國公從藹至齊州防禦使贈武勝軍節度觀察留後  
韓國公守異從藹卒以惟忠子從信襲封榮國公官  
至雄州防禦使贈保寧軍節度使楚國公從信卒以  
惟忠之孫從恪子世規襲封崇國公官至右龍武大  
將軍沂州防禦使以卒守異子世清累官茂州防禦  
使以本宮之長得封申國公熙寧中坐上書請襲曾  
祖越懿王封不當奪一官既而議者是其說乃遷越  
州觀察使襲封越國公進會稽郡王至保信軍留後  
愛諸弟作棣萼會於邸中會元豐升祔四后受命告  
廟方屬疾自力就事未幾薨贈安化軍節度使開府

儀同三司號王謚恭安子令廓嗣元符三年改今封  
先是熙寧中詔封楚康惠王之孫從式為安定郡王  
奉太祖祀及從式薨乃以懿王曾孫世準襲封安定  
郡王世準從藹子也為人內恕外嚴無綺羅金玉之  
好凡天子郊廟必從祀由金州觀察使拜保靜軍節  
度使薨年六十八贈開府儀同三司追封成王世開  
襲封世開從誨子惟和孫也七八歲日誦萬言既長  
學問該洽事後母孝撫孤姪如己子官官吳申為御  
史薦其學行命試學士院累召不赴神宗褒異之召  
對便殿論事甚衆時官僚有缺不即請而以他官攝

故私謁公行宗女當嫁皆富家大姓以貨取不復事  
銓擇世開悉言之帝嘉納欲以為宗正固辭乃進一  
官以其所列著為令官至奉國軍留後薨贈開府儀  
同三司追封信王謚獻敏世雄嗣世雄亦從藹子少  
力學知名熙寧中詔宗子以材能自表見者官長及  
學官以名上世雄子令鑠在選中嘗請營都宅以處  
踈屬立三舍以訓學者詔用其議置兩京敦宗院六  
宮各建學徽宗即位以世雄於太祖之宗最為行尊  
拜崇信軍節度使襲安定郡王知大宗正事崇寧四  
年薨年七十五贈太尉追封淄王謚恭憲世福襲封

世福從信子官至集慶軍節度使薨贈儀王令盪襲  
爵令盪秦康惠王曾孫也惟正天聖七年以久病帝  
欲慰安之由保鞞節度觀察留後樂安郡公特拜建  
寧軍節度使卒贈侍中追封同安郡王謚僖靖無子  
以弟惟忠子從謹為嗣官至左龍武大將軍温州團  
練使坐射殺親事官削官爵幽之別宅從謹少好學  
以剛褊廢遂自剄死帝甚悼之贈濟州防禦使濟南  
侯惟吉字國祥母鄭國夫人陳氏惟吉生甫彌月太  
祖命輦至內廷擇二女媪養視之或中夜號啼必自  
起撫抱三歲作弱弓輕矢植金錢為的俾之戲射十

發八中帝甚竒之五歲日讀書誦詩帝嘗射飛鳶一  
發而中惟吉從旁雀躍喜甚帝亦喜鑄黃金為竒獸  
瑞禽賜之常乘小乘輿及小鞍鞍馬命黃門擁抱出  
入常從太祖崩惟吉裁六歲晝夜哀號孝章皇后慰  
諭再三始進饘粥太宗即位猶在禁中日侍中食太  
平興國八年始出居東宮授左監門衛將軍封平陽  
郡侯加左驍衛大將軍進封安定郡公淳化四年遷  
左羽林軍大將軍至道二年授閩州觀察使凡邸第  
供億車服賜與皆與諸王埒自餘王子不得偕也真  
宗即位授武信軍節度加同平章事時石保吉先為

使相詔惟吉班其上大中祥符初封泰山以疾不從  
行詔許疾愈馳詣行在還頓鄆州惟吉迎謁上勞問  
再三改感德軍節度明年疾復作上屢臨省之親視  
灼艾日給御膳為營佛事三年五月薨時年四十五  
廢朝五日贈中書令追封南陽郡侯謚康孝惟吉好  
學善屬文性至孝孝章皇后撫養備至親為櫛沐咸  
平初以太祖孝章畫像服玩器用賜惟吉歲時奠享  
哀慕甚至每誦詩至蓼莪篇涕泗交下宗室推其賢  
孝雅善草隸飛白真宗次為七卷御製序命藏祕閣  
其子守節以父所書真草千文以獻詔書褒答仍付

史館追贈太尉明道二年封翼王子守節守約守巽  
守度守廉守康守節累遷彰化軍節度觀察留後同  
知大宗正事卒贈鎮江軍節度使追封丹陽郡王謚  
僖穆子世永世延世永襲邢國公官至鎮南軍留後  
熙寧元年薨贈昭信軍節度使南康郡王謚脩孝世  
延終右武衛大將軍絳州防禦使贈武寧軍節度觀  
察留後彭城郡公守約終內園使康州刺史贈沂州  
團練使子世靜世長世靜至左武衛大將軍均州防  
禦使卒贈鎮海軍節度觀察留後北海郡公世長終  
左武衛大將軍解州防禦使贈張信軍節度觀察留

後濟陽郡公守巽及其子世清事見上守度終左領  
軍衛大將軍英州團練使贈廣州觀察使廬江侯守  
廉終拱備庫副使贈內藏庫使守康至供奉官惟固  
字宗幹本名元辰太平興國八年改賜名授左千牛  
衛將軍是冬卒惟忠字令德初名文起太平興國八  
年賜今名授右千牛衛將軍四遷右龍武軍真宗即  
位改右千牛衛大將軍大中祥符二年進左監門衛  
大將軍叙州刺史五年進昌州團練使八年卒贈鄂  
州觀察使追封江夏侯明道二年加贈彰化軍節度  
使追封舒國公子從恪從藹從秉從顥從謹從質從

信從讜從恪累官西染院使卒贈磁州刺史東萊侯  
子世規襲封崇國公從藹終左衛大將軍齊州防禦  
使贈武勝軍節度觀察留後追封韓國公子世豐終  
太子右衛率追贈進士及第世準世雄並安定郡王  
從信封榮國公官至雄州防禦使贈保寧軍節度使  
楚國公謚安僖子世福襲安定郡王從秉從頴從謹  
並禮賓使從質內殿崇班從讜出繼惟正惟和字子  
禮端拱元年授右武衛將軍歷右驍衛神武龍武軍  
右衛將軍大中祥符元年領澄州刺史四年遷右千  
牛衛大將軍六年卒年三十六贈汝州防禦使臨汝

侯明道二年加贈永清軍節度觀察留後追封清源  
郡公惟和雅好學為詩頗清麗工筆札優游典籍以  
禮法自居宗室推重嘗和御製詩上稱其有理致及  
卒上謂宰相王旦等曰惟和好文力學加之謹愿皇  
族之秀也不幸短命嗟悼久之至於泣下錄其藁二  
十二軸上親製序藏于秘閣子從審從誨從審終復  
州防禦使贈寧國軍節度觀察留後宣城郡公嘗坐  
與人姦除名已而復官從誨終左金吾衛大將軍台  
州團練使贈襄州觀察使襄陽侯子世開安定郡王  
事見上紹興元年詔曰太祖皇帝初業垂統德被萬

世神祖詔封子孫一人為安定郡王世世勿絕今其封不舉朕甚憫之有司其上合封人名遵故事施行時燕秦二王後爭襲封禮部員外郎王居正上言燕王親太祖長子其後當襲封議遂定自紹興至嘉定襲封者十五人惟令時令應令諤令衿迹頗著餘皆繼嗣姪姪無足稱令時字德麟燕懿王玄孫也蚤以才敏聞元祐六年簽書潁州公事時蘇軾為守愛其才因薦于朝宣仁太后曰宗室聰明者豈少哉顧德行何如耳竟不許軾被竄令時坐交通軾罰金已而附內侍譚稹以進紹興初官至右朝請大夫呂頤浩

請以令時主行在太宗正司帝命易環衛官願浩言  
令時讀書能文恐不須易帝曰令時昔事譚稹頗違  
清議改右監門衛大將軍榮州防禦使權知行在大  
宗正事遷洪州觀察使襲封安定郡王尋遷寧遠軍  
承宣使同知行在太宗正事四年薨貧無以為殮帝  
命戶部賜銀絹贈開府儀同三司令疇紹興五年由  
邵武軍兵馬都監襲封授華州觀察使尋除同知大  
宗正事踰年薨令憲字深之初懿王生昌州團練使  
惟固惟固生楚安僖王從信從信生益公世逢世逢  
生令憲授右班禁直遷東頭供奉官累監州縣場庫

監司薛昂薦其才易資承事郎調潁州簽判歷綿州通判累知蜀州閬州慶源府召除衛尉少卿擢秘閣脩撰再知慶源府建炎二年分西外宗子於泰州命令慮知西外宗正事除御營使司參贊軍事挈宗子避地福州因置司焉元懿太子薨帝命令慮選藝祖後得三四人尋擢集英殿脩撰知南外宗正再選宗子得伯琮伯浩養宮中後選得伯玖性亦聰惠高宗喜轉令慮知泉州尋與祠以歸令砮薨令慮改閬州觀察使襲封除同知大宗正事踰年授鎮東軍承宣使再遷保平軍節度使紹興十三年薨年七十五贈

少師後追封惠王謚襄靖子子游官至湖北提刑用  
戶部侍郎王俱薦加直秘閣會建寧節度使士劉知  
南外宗正司以事去官言者請擇宗室文臣之廉正  
者代之遂以命子游西南外宗官用文臣自子游始  
令諤字君序以父任補右班殿直政和中遷承忠郎  
召試授從事郎宣和二年以貢士試舍選合格授宣  
教郎調信州永豐縣丞中興初累遷福州運判兼提  
點刑獄公事秦檜方柄用安定郡王絕封者十餘年  
檜死次令衿當封適以事被拘遂命令諤襲封已而  
令諤以爵遜令衿乃陞令衿秘閣脩撰知台州移知

紹興府召權戶部侍郎領嚴饒二州鑄錢局先是諸州錢監兵匠多缺不補積其衣糧號三分缺額錢令詔請以其錢付諸監省朝廷降銅本錢又建議州縣賣官田計所入高下守令進秩減磨勘有差州縣義倉多紅腐請歲出三之一以易新粟水旱為災檢放不及七分處所即許振恤皆從之令衿薨令詔由崇慶軍承宣使再襲封隆興初除同知大宗正事奏減生日支賜并郊祀賞給以助軍興詔褒之遷敷文閣直學士特授左中大夫知紹興府引疾乞祠以歸尋薨年六十八令詔蒞事明敏有風采然在廣東日嘗

與副使章菱不協陰中以法陷菱於死世以此少之  
令衿嘉孝穆公世峽子也博學有能文聲中大觀二  
年舍選靖康初為軍器少監言事忤旨奪官紹興七  
年以都官員外郎召張浚罷令衿請對留浚言官石  
公揆論令衿阿大臣復罷久之以事抵臨安中丞李  
文會劾令衿昔為大臣緩頰今復奔走請託詔送吏  
部吏部直令衿奏除德安府通判遷知泉州泉屬邑  
有隱士秦系故廬唐相姜公輔墓邑旁令衿建堂合  
祠之郡人感其化歸寓三衢嘗會賓客觀秦檜家廟  
記口誦君子之澤五世而斬之句通守汪召錫檜兄

壻也頗疑令衿諷教官莫汲訴令衿論日月無光謗  
訕朝政侍御史董德元承風旨劾之誣以賊私詔下  
令衿獄案驗無狀乃論令衿謗訕不遜追一官勒停  
令南外宗正司拘之檜除召錫湖南提舉以報之街  
令衿必欲置死地初趙鼎之子汾歸過衢令衿贖之  
侍御史徐嘉希檜旨誣令衿與汾有密謀伺朝廷機  
事捕汾下大理寺俾汾自誣與張浚李光等謀逆而  
令衿預焉獄上檜病不能省乃獲免檜死復爵二十  
六年授明州觀察使襲封引疾乞奉燕王祠許之尋  
加慶遠軍承宣使二十八年薨贈開府儀同三司令

話建炎末為右武衛大將軍信州防禦使熙寧初首  
封秦王孫從式已而更封燕王曾孫世清宣和中又  
封秦王元孫令盪令盪卒令庇年最長禮官以為小  
宗不當封紹興元年六月令話得襲封授寧州觀察  
使二年七月薨贈開府儀同三司令德乾道元年為  
武德郎時安定郡王令詔換文階太宗正司奏令德  
授定武軍承宣使襲封令德貧幾不能出蜀七年令  
德薨令愷當封以沈湏聲色不任襲詔武德郎令搆  
襲封除金州觀察使令搆薨時秦王後無當襲者武  
翼郎子棟屬燕王後年又最長得襲封子棟薨九年

四百字  
九月忠訓郎子彤襲授容州觀察使紹興二年薨年八十餘慶元元年十月忠翊郎子恭襲授利州觀察使子恭薨嘉定二年七月子覲襲授金州觀察使四年十一月伯栩襲授宣州觀察使嘉定元年十月伯祝襲授福州觀察使八年十一月伯澤襲授潭州觀察使

秦康惠王德芳開寶九年出閣授貴州防禦使太平興國元年授興元尹山南西道節度使同平章事三年冬加檢校太尉六年三月寢疾薨年二十三車駕臨哭廢朝五日贈中書令岐王及謚後加贈太師改

楚王子三人惟叙惟憲惟能慶曆四年詔封十王之  
後以惟叙子從照封安國公終左金吾衛大將軍歸  
州團練使贈同州觀察使齊國公從照卒以惟能子  
從古封安國公終延州觀察使贈保靜軍節度使同  
中書門下平章事楚國公謚惠恪從古卒惟憲子從  
式襲封舒國公神宗即位謂勅業垂統實自太祖顧  
無以稱乃下詔令中書門下攷太祖之籍以屬近而  
行尊者一人裂土地而王之使常從獻于郊廟世世  
勿復絕於是有司推擇以從式應詔封安定郡王終  
保康軍節度使贈同中書門下平章事追封榮王謚

安僖從式既薨詔以越王曾孫世準襲封安定郡王  
而以從式子世恩襲爵為楚國公主楚王德芳之祀  
遷楚州防禦使卒贈奉國軍節度使謚良僖徽宗即  
位改封楚王為秦王惟叙字懋功性純謹頗好學端  
拱初授左武衛將軍四遷左衛將軍領勤州刺史大  
中祥符四年從祀汾陰拜左千牛衛大將軍八月卒  
年三十五贈懷州防禦使追封河內侯明道二年加  
贈保靜軍節度觀察留後高平郡公子從照封安國  
公從溥至右侍禁內殿崇班惟憲字有則美丰儀少  
頗縱肆長修謹善射好吟詠多讀道書端拱初授左

屯衛將軍累遷左羽林將軍領濱州刺史加左衛大將軍領賀州團練使真拜資州團練使大中祥符九年五月卒年三十八贈安德軍節度使兼侍中英國公子從式始封安定郡王事見上從演禮賓副使從戎從戒從湜並內殿崇班從賁供奉官惟能字若拙端拱初授右屯衛將軍累遷右神武軍將軍大中祥符元年五月卒年三十贈蔡州防禦使張掖侯明道二年加贈集慶軍節度觀察留後南康郡公子從古襲安國公從善內殿承制從贄崇班

安僖秀王子偁秦康惠王之後高宗族兄也康惠生

英國公惟憲惟憲生新興侯從郁從郁生華陰侯世  
將世將生東頭供奉官令儉令儉生子儼宣和元年  
舍試合格調嘉興丞是年子伯琮生後被選入宮是  
為孝宗子儼召赴都堂審察改宗教郎通判湖州尋  
除直秘閣賜五品服孝宗既封建國公就傅子儼召  
對言宗室之寓于外者當聚居官舍選尊長鈐束之  
年未十五附入州小學十五入大學許依進士就舉  
未出官者亦許入學聽讀及一年聽參選高宗納其  
說遷朝奉郎祕閣脩撰知處州已而乞祠許之累官  
左朝奉大夫紹興十三年秋致仕明年春卒于秀州

時孝宗為普安郡王疑所服詔侍從臺諫議秦熿等請解官如南班故事普安亦自請持服許之及普安建節子備以恩贈太子少師既為太子加贈太師中書令封秀王謚安僖配張氏封王夫人孝宗受禪稱皇伯園廟之制未備紹熙元年始即湖州秀園立廟奉神主建祠臨安府以藏神貌如濮王故事仍班諱嗣秀王伯圭字禹錫孝宗同母兄也初以恩補將仕郎調秀州華亭尉累官至浙西提刑司幹辦公事除明州添差通判孝宗受禪上皇詔除集英殿脩撰知台州伯圭在郡頗著政績除敷文閣待制改知明州

充沿海制置使蕃商死境內遺貲巨萬吏請沒入伯  
圭不可戒其徒護喪及貲以歸陞敷文閣直學士以  
憂去服闋再知明州新學官命宗子入學閑以規矩  
詔徙戍定海兵於許浦伯圭奏定海當控扼之衝不  
可撤備請摘制司軍以實其地從之海寇猖獗伯圭  
遣人諭降其豪葛明又遣明禽其黨倪德二人素號  
桀黠伯圭悉撫而用之賊黨遂散以功進一官累陞  
顯謨閣龍圖閣學士在郡十年政寬和浚湖陂均水  
利辨冤獄嘗獲鑄銅者不忍寘諸法諭令易業民由  
是無再犯淳熙三年授安德軍節度使尋加開府儀

同三司充萬壽觀使朝德壽宮上皇賜玉帶加少保  
封滎陽郡王高宗崩入臨充攢官總護使除少傅光  
宗即位陞少師踰年召見遷太保封嗣秀王賜甲第  
於安僖祠側臣僚上言治平中追崇濮邸王子孫幾  
二十人皆自環衛序遷其官今居南班者止師夔一  
人非所以強本支而固磐石也前未建秀邸時欲賦  
以祿則不免責以吏事今已建邸而猶責吏事他日  
或不免於議治則傷恩不則廢法曷歸之南班俾無  
吏責而享富貴遂詔伯圭諸子得換班紹興二年除  
判大宗正事建請別立宗學以教宗子超拜太師免

字四百九  
奉朝請尋兼崇信軍節度使賜第還湖州尋薨于家  
訃聞帝為輟朝三日追封崇王謚憲靖伯圭性謙謹  
不以近屬自居每日見行家人禮雖宴私隆洽執臣  
節愈恭一日孝宗問潛龍時事伯圭辭曰臣老矣不  
復能記問至再三終不言帝笑曰何太謹也益愛重  
之嘗欲廣其居並湖為複閣有司既度材矣伯圭固辭  
而止阜陵成遷中書令凡五讓寧宗嘉其志詔別議  
褒崇之禮贈贊拜不名有輿至殿門子九人師夔師  
揆師垂師高師禹師臯師岩師彌師貢師夔字汝一  
初以祖恩補官調太平州蕪湖簿隆興元年改右承

務郎歷台州秀州通判直秘閣尋知徽州新學舍進  
直徽猷閣知湖州時歸附從軍而廩於湖者衆不能  
給師夔請增廩仍別給餼屋錢以安其心帝稱善詔  
諸郡行之除直龍圖閣遷浙西提刑改江東運判建  
康務場往往奪民利為害滋甚師夔首罷之守臣以  
郡計所資詣師夔請復舊不從池州軍帥霍政與守  
臣交上書相攻詔師夔究曲直政密遣人求庇師夔  
斥之具言狀政坐罷去改秘閣脩撰知明州兼沿海  
制置使加敷文閣待制轉永慶軍承宣使紹熙元年  
侍父入覲除興寧軍節度使寧宗即位加檢校少保

充阜陵橋道頓遞使阜陵成遷開府儀同三司侍父  
歸父薨未踰月師夔亦卒年六十一贈少師追封新  
安郡王師揆字元輔初補右承務郎奉祠除添差湖  
州簽判改婺州通判加直祕閣守臣韓元吉薦其材  
上以問史浩浩言其聰爽可任召對除江東提舉奏  
免失陷常平人毋責償改淮南漕尋遷淮西提刑兼  
提舉領屯田事奏以荒圩給軍士其屯田為民世業  
者勿奪從之及代去吏請獻羨錢二十萬師揆曰後  
將病民矣除直祕閣改江東轉運副使加祕閣脩撰  
知明州紹興元年授觀察使寧宗即位除奉國軍承

宣使尋陞節度使召見賜肩輿超檢校太保開府儀  
同三司充萬壽觀使襲封開禧元年奉朝請嘉定七  
年薨贈太傅追封澧王謚恭惠弟師禹由保康軍節  
度使除開府儀同三司襲封十六年薨贈太傅追封  
和王謚端肅

列傳卷第三